

列
朝
詩
集

列朝詩集

甲集第七

楊按察基眉菴集古今詩二百五首

集外詩十首

寄內婉素

天寒思故衣家貧思良妻所以孟德耀舉案與眉齊憶汝事我初高樓映
深閨珠鈿照羅綺簪珥搖玉犀梳掠不待曉妝成聽鳴雞中吳昔喪亂壯
口各東西有母不得將獨汝與提携我復竄遠方送我當路啼紛紛道上
人無不爲憐悽今年我還家赤手無所賁汝亦遇多難典賣簪珥并朝炊
粥一盂暮食鹽與蕪堂有九十姑時復羞豚蹄膏沐弗暇澤髮落瘦且羸
別來復秋深露下百草淒破碎要補綴甘旨需醬醢安貧兼養老此事汝
素稽作詩遠相寄新月當窓低

舟中有感

水性日就下大江日東馳不知舟行遠但覺青山移我方念儔侶手反坐
拄頤天風吹衣裳明月來相隨乘流非不住逝者乃如斯滔滔適意中忽
然令人悲壯歲難再得修名安可期

出臺復還洪都

福至本無象禍來非有因方憂觸羅網遽喜辭妖塵念此蓬蒿姿忽邁蹇
與屯倉黃園扉中日夕與死隣皇明眷私照寒谷回陽春旣免在滌牲復
縱克庖鱗重沐飭冠裳濟溺立要津道路與我慶沉我骨肉親歸來向妻
孥秉燭語及晨猶疑是夢寐歡樂恐未真嗟余抑何艱坎壈多苦辛弱無
勝力雖而欲舉萬鈞羸牛服鹽車遙遙西入秦進逢九坂危退迫尺筌嗔
敢惜筋力疲所慮車摧輪哀鳴徒嗷嗷仰訴空諄諄聽者無不憐誰復爲
解頰終當脫羈鞅滄波浩難馴

送方以亨還吳興三首

以亨來洪都省兄以常予因與之游者累月旣而將還吳興其兄錄所贈
詩見示余喜而作三章以餞之

草有不可偃木有不可彫人心非秋蓬安得隨風飄憐君玉雪姿明月當
清宵葳蕤紫荊花輝映非一朝噫噫寒江雁去去誰能招
遠別腸欲斷近別淚滿纓交遊無不然而況弟與兄荒塗霜露繁哀角響
故城去傷骨肉思佳感鄉里情還家及東作翳翳桑麻成

賢女失之陋壯夫失之貧相逢無所遺慷慨不得伸臨岐歌短章所道皆苦辛淮陰未去楚江總復仕陳聊沽客中酒用酌還鄉人

送方員外之廬陵

十年在羈旅未嘗憂別離如何與君辭愴如失羣麋君才非我儔語默皆可師溫溫霜天裘細細當暑絺不勞綺繡文自然適時宜嗟我百無補不異面有蒼旣乏視聽功寧免耳目嗤君行值重午高花發柁葵荆人擊鼙鼓舟楫挾兩旗當時懷沙心後世爲水嬉作歌贈君別秋風以爲期

發南浦

開船別西山迤邐向南浦帆輕去自速初不用篙櫓蒼蒼煙中樹橐橐響斤斧一女沙上汲衆漁洲畔語我行歲云晏況復遠儔侶回首北歸鴻翩翻下寒渚

夜過市汊驛時酒醒月出有懷幕中諸友

驛在豐城北

驛樓枕邇洲湍湍聲活活霜蘆花猶泛烟柳葉漸脫月出鳬雁鳴孤舫寒江闊酒緣風力退詩苦真景奪何處寄相思浮雲楚天末

望蘄州

未見蘄州城已見蘄州山諸山初不高蒼石礪且頑想當至正時民物庶以殷大江楚西來萬里不閉關茲山獨儲英羣雄出其間遂爲禍亂堦滋蔓莫可刪憶我聞亂初我方總兩鬢侍立父祖旁聽說國步艱焉知三十年見此草與管骨肉亦已零安得髮不斑披榛欲吊古豺虎愴我顏蒼茫望茆宇日落孤舟還

過小孤

大孤俯如盤小孤儼而立羣山如從使左右相拱揖孤根屹撐拄萬竅爭噴噏瀏瀏陰風旋慘慘元氣濕江流亘其下震怒莫敢汲洑爲盤渦深馳作奔馬急躋攀或失手一駛不可及我來值秋晚木落衆鳥集勿變夜船犀蛟人抱珠泣

望南岳

我從匡廬來但覺諸山低嗟峨望衡岳雲霄與之齊下有赤蛇蟄上有朱雀棲仰瞻祝融拔俯揖紫蓋迷五嶺皆培塿三江爲泮蹄巍然南服尊嵩霍相提携封秩崇君稱諸神咸朝齊丹書篆寶冊萬古封金泥百王重祀

典赤纁藉玉圭自非精靈通牲帛勞焚賁余方向遠道無由陟層梯蒼蒼
煙霞中喔喔聞天雞緬思昌黎伯恭默開雲霓靈貺自昭格誠敬良可稽
斯人久云沒感念徒含悽

發衡州 一本題作白髮

五日白一髮十日皺一膚人生冰雪容終作韡紋麓今朝清鏡中已與昨
日殊不憂鬚眉蒼但恐皮肉枯肉枯亦常理所念非壯圖有親恩最深撫
養勞勤劬憐我幼失怙愛我如掌珠斯恩未及報不敢忘須臾書來得凶
問哀頓空號呼衣衾與棺斂弗得親走趨家山在萬里那能返故都樹頭
啞啞啼愧殺返哺烏有子初學言行步要母扶已解索梨栗未知識之無
重在託宗祀豈暇問賢愚弟妹皆漂零遠在天一隅仲氏久無信夢中時
友于艱難斥鹵濱何以保微軀計工當已還母乃東歸吳童僕各分飛僅
有赤脚奴吟漚苦肺疾終夜聲嗚嗚憐渠亦解事剪伐供樵蘇異鄉骨肉
遠賴此相支吾嗟我客梁楚隻身亦崎嶇白晝畏豺虎夜防狸與狐所賴
筋力強竄伏幸無虞今年覺衰倦自怯行遠途東風洞庭波落日青草湖
魚龍來欺人煙濤慘模糊茲晨過衡陽霽景差可娛桃花白練帶春水綠

菰蒲感此顏色妍
暫使憂心甦
萬事信有命
撫膺長嘆吁

湘江道中思常宗

暮江散微雨
風定波自碧
一鷺立不飛
雙鴻遞相直
餘煙菱女唱
新月漁郎笛
此處忽懷人
相思杳何極

湘竹有題

朝行湘竹下
暮宿湘竹中
雲情與雨態
萬變俄不同
密密深翳日
疎疎細含風
新梢露裊裊
老節煙濛濛
紛如千靈妃
從以萬青童
旛幢列縹緲
環珮搖丁東
來從蔚藍天
步入東華宮
悵望不可卽
翩然若驚鴻
天矯喜而笑
低回俯乃恭
質堅本外直
性潔緣中空
蘊爾中弦矢
揉之可彤弓
冰雪豈不易
肯與時汚隆
今朝揭春晴
更覺翠色濃
戢戢琅玕叢
忽見桃花紅
直疑路不遠
便與桃源通
我欲捐輕舟
褰衣入崆峒
春禽迎我啼
音響諧絲桐
終當聽山雨
自號蒼莨翁

瀟湘八景

靄靄復霏霏
橫霄曳夕暉
巴人與湘女
相逐買鹽歸
回望墟烟處
蒼茫隔翠微
右山市晴嵐

今朝罷漁早掛網堤邊樹雲斷一峯青斜陽在坳處痴兒晚睡醒却訝東
方曙

右漁村夕照

孤塔望中青鐘聲隔洞庭蒼山不可及煙濶浪冥冥憶似寒山寺楓橋半
夜聽

右烟寺曉鐘

風攬瑞花晚江寒波欲凝凍僵業漁者歸載一船冰一自迷沙渚柴扉認
有燈

右江天暮雪

輕帆挂春風倒映湘江綠天低浦漱遠歸向誰家宿遙指落花西黃陵廟
前屋

右遠浦歸帆

江橫秋烟白日落寒沙淺鴻雁萬里來翩翩下平遠欲墮更低飛斜行兩
三轉

右平沙落雁

風急雨浪浪孤舟夜正長江湖隨處惡何況是瀟湘今夜殘燈裏無人不
斷腸

右瀟湘夜雨

湘水秋更清湘月秋更白光輝一相蕩水月不辨色何處洞簫聲巴陵夜
歸客

右洞庭秋月

登三夏故城二首

寒樹無柔柯秋草有勁葉原空鵲孤窳山晚雲萬疊登高得平曠人馬皆
意愜思挽角胎弓相從雁門獵

關前葉猶青關後草已白氣候本不殊山勢有阻隔風高鼓角動日落川
塞黑邊鴻一聲來壯士亦變色

金陵對雪用蘇長公聚星堂禁體韻

黃雲凍凝不成葉十載江南無此雪朱簾十二曉開齊正值千山鳥飛絕
墻腰簷角危欲墮竹頂松梢重將折偏來舞殿闌輕盈忽上金釵易消滅
誰家沉火吹笙坐着處銀瓶呵手掣脂凝香麝罷晨妝臉暈微潤散春纈
帶雨欲沾仍作片因風誤觸俄成屑漁蓑向晚盡難工歌樓未曉光盈瞥
怪事休驚越大吠豐年每信吳儂說欲和東坡白戰詩冰滿霜毫硯如鐵
聽老京妓宜時秀歌慢曲

春雲陰陰圍繡幄梨花風緊羅衣薄白頭官妓近前歌一曲纔終淚先落
收淚從容說姓名十三歌學郭芳卿先皇最愛芳卿唱五鳳樓前樂太平
鼎湖龍去紅妝委此曲宜歌到人耳潛向東風作慢腔梨園不信芳卿死
從此京華獨擅場時人爭識杜韋娘芙蓉秋水黃金殿芍藥春屏白玉堂

風塵回首江南老，衰髻如絲顏色槁。深嘆無人聽此詞，縱能來聽知音少。說罷重歌爾莫辭，我非徒聽更能知。樽前多少新翻調，一度相思一皺眉。

喜客來

壯年不愁長作客，亦不暇愁鬚雪白。但愁金盡酒樽空，辜負長安好春色。閉門三日生綠苔，失喜忽聞佳客來。急拈春衣典春酒，正值滿樹梨花開。花如冰雪人如玉，妙舞清歌懽不足。黃昏客醉酒未醒，細雨鶯啼梅子綠。

送張教諭

西湖五月涼風起，荷葉荷花香旖旎。先生到縣花正開，濯足船頭弄秋水。北朝復興文武科，諸生習射更絃歌。他年大比登髦俊，應報新昌縣裏多。

雨中看花

青青楊柳深深竹，雨裏絳桃開一簇。羞將瘦蹇逐金鞍，着屐看花仍不俗。花枝淨洗胭脂面，老眼驚如夢中見。已拚春色過三分，何止東風吹一片。只恐天晴是暮春，半隨流水半成塵。淡煙芳草長于路，作意能來有幾人。

送李琴川謫臨海

南風雨來塵作泥，稻花豆莢生初齊。一人失意解官去，席上衆賓顏色低。

輶車欲發未忍別感慨握手立大堤綠荷爲杯樹爲蓋碧酒蕩漾青琉璃
茲行觸熱向甌越只尺浙水分東西或登雲門探禹穴或上雁岩聞天雞
天台桃花千萬樹中有睨睨黃鸝啼雖云竄謫異憂喜眺望自可窮天梯
韓潮柳播夜郎白吉士往往遭傾擠蕉中之鹿塞翁馬此事何足含悲淒
但嗟靈物困汚瀆無一出手相提携不然寵辱實命致毋乃天不哀羣黎
渡江秋風未十日織女值嫁牽牛妻自甘沉匿守太拙寧復乞巧陳瓜梨
嗟余遘患屢遷逐親見鄱塢爭燃臍金多位重胡足恃頃刻變化如雲霓
君年五十髮漆黑壯氣鬱鬱衝端倪驕驪歷塊偶蹀躞終展奮迅追風蹄
經過虎阜坐石壁爲我拂拭苔中題

宜秋軒桂

宜秋軒詩叙云予去官結小軒自適軒近秦淮清曠幽寂與秋相宜故號宜秋

軒東古桂一株花已爛熳人無知者偶夜聞香自東來旦起訪之得於荒
庭廢苑中余旣嘆其不爲人所賞識而復嘉其不以無人而不香也繞樹
嗟悼慰之以詩

宜秋軒東一株桂香葉婆娑擁寒翠秋堂夜靜風滿簾時覺幽芳來拂鼻

清晨曳履訪幽獨一徑青苔雙戶明離離嫩蕊香蟲絲款款輕花落
金沍露濃更密苞粟凝珠疎復細半粒能含萬斛香一枝解奪千姝麗
當年此地競攀折月戶雲窓敞秋霽金樽灑泛綠色酒翠袖涼簪寶粧髻
西風幾度人跡絕獨有幽花能點綴村荒地僻霜露繁摧折紅蘭凋紫蕙
瞥然一見衆憂失不意孤懷得佳麗更深月出擬再來明日紛紛嗟滿簪

宜秋軒梅

萬松嶺上梅千樹踏雪年年看花去湖邊十里翠裙腰盡是看花醉眠處
花今憔悴不如前人亦飄零二十年夢魂不到西湖上春色自繞南枝邊
今年看花來杜曲一樹寒香照茆屋別是人間冰雪魂肌膚綽約清如玉
雪更玲瓏玉更溫春風入頰淡無痕數聲殘角黃昏後獨自相看半掩門

贈吳居易別

黃梅雨晴桑重綠南風棟花開蔌蔌故人謁我此山隈帶束烏犀帽輕縠
入門相顧如夢寐名姓雖忘面仍熟久之稍稍憶舊游尚恐非真問童僕
遂昌先生鄭元祐也吳中老儒客滿座君時雄辯衆賓服先生博學且敬
君况我才疎敢相逐蘇臺一別已十載世事飄如電經目羨君遊俠印屢

懸嗟我巢傾卵俱覆去年謫官向河洛手脚酸軟雙髻禿歸來親友半死
生不意逢君此江曲摩挲老眼爲君喜更覺君顏美如玉龍江花落乳燕
飛芙蓉藥大筍過竹殺雞沽酒招我飲爛醉頽然坦其腹深情密意語未
終舟楫匆匆去何速臨流索我題詩送詩句難工羞再讀廬山東來五老
峯大孤小孤青亂巖着我茅茨一二間悠然醉把東籬菊

題宋周曾秋塘圖有序

右宋周曾秋塘圖一卷前元皇姊大長公主所藏也前有皇姊圖書印記
後有集賢翰林諸詞臣奉皇姊教旨所題自大學士趙世延王約而下凡
十六人時鄧文原袁伯長俱爲直學士李涸以翰林待制居京師爲監修
國史實至治三年也元運方隆皇姊雅尚文學一時名公鉅儒以文章翰
墨寵遇當世其盛蓋可想見元旣革命此卷遂出江左吾友薛起宗得於
其私沈祥氏一日携以見示且徵題詩余雖不獲援筆其間而一十六人
者猶及親炙一二袁鄧二老又皆先子之友不可作矣把玩再四敬題于
後

陂塘九月菰蒲老菱葉無多荷葉少無數飛來白鷺明一羣遊去青鳬小

寒雲弄影忽成霞雁帶斜行下淺沙晚色不隨流水去秋光都在拒霜華
當時內殿春風細紫衣傳教詞臣醉鮑謝文章沈宋才詩成曲盡秋塘意
塘水秋來景漸疎低煙斜日照平蕪鴛鴦去盡芙蓉死空向人間看畫圖

北山梨花有片

余卜居金川是金陵城西北門也去北山無十里每清明時梨花盛開輒
動洗妝之想隣友薛起宗邀余看者再俱以猥俗所繫不能如約昨又期
出郭風雨泥濘弗良於行起宗爲折一枝相贈喜而賦此辛亥暮春五日
北山梨花千樹栽年年清明花正開薛君好事兩邀我騎馬看花携酒來
看花出郭我所愛況是梨花最多態我牽塵俗不得赴花本無情花亦怪
君今折花馬上歸索我細詠梨花詩冰肌玉骨未受飾敢以粉墨圖西施
東坡先生心似鐵惆悵東闌一枝雪重門晚掩沉沉雨疎簾夜捲溶溶月
月宜淺淡雨宜濃淡非浪白濃非紅閨房秀麗林下趣富貴標格神仙風
一枝寂寞開逾徧朶朶玲瓏看應眩皓腕輕籠素練衣娥眉淡掃春風面
自須玉堂承露華何事種向山人家不愁占斷天下白正恐壓盡人間花
江梅正好憐清楚桃杏紛紛何足數只有銀燈照海棠海棠亦是嬌兒女

句容送蔡惟中

昨日立秋今日涼
蔡子束書歸故鄉
我來未久子遽別
子豈與我如參商
自慙貧無橐金贈
解劔換酒澆愁腸
醉酣月出重露滴
梧飄金井芙蓉香
衆賓誼譁噱笑口
我獨不語情徬徨
豈徒戚戚兒女態
感舊懷古增悲傷
憶昔追遊茂苑上
白馬紫轡青絲韁
子方年少富文學
面如紅玉肥有光
黃金曉酬西館客
綠錦夜贈東樓嬌
三公走檄辟作掾
兩府交薦除爲郎
風塵一別未十載
短鬢蕭颯俱老蒼
黑巾籠頭着野服
微雨鵲立官道傍
自云匍匐事販鬻
蓋股巾篋紙筆將
匪爭刀錐競微利
聊復糊口走四方
我聞此語重嘆息
助以唧唧鳴寒螿
丈夫失意固如此
屠狗買春庸何妨
曲江之西沙柳黃
夜逐落潮登野航
相逢故友或相問
勾曲岡頭一草堂

贈許白雲

白雲老翁樂且貧
眼如紫電炯有神
麻衣紙扇趺兩展
頭戴一幅東坡巾
清晨扣戶走過我
謂我舊是諸侯賓
入門長揖肆雄辯
動引四代卑先秦
初疑傲睨意骯髒
稍久漸覺情真淳
從茲興至每一到
不問風雨并昏晨
矯如野鹿不受繫
去不可挽送乃嘆
我來杜曲少朋舊
一境二姓唯朱陳

租徵稅迫夜繼日未暇與我談
我時信口答所問怪我出語多驚人
我慚習懶竟成癖日影照腹脚未伸
起來巾櫛不自理一飯且飽南湖尊
諸生幼弱學久廢數字費我言諄諄
翁來相對慨太息謂可館閣胡沉淪
人生富貴等泡幻達何可意窮何掣
紛紛道路餓死骨半是臺省公侯身
龐公未爲無所遺夫婦白首裝陽民
翁聞我語乃大噱呼我共醉華陽春
正須狎暱到鷗鷺何必影像圖麒麟
秦淮雨過秋水碧中有一尺黃金鱗
明朝買魚期再酌我自掇拾山中薪

杜伯淵送新米

山人送我山田米粒粒如霜新可喜
雨春風播落紅芒照眼明珠絕糠粃
飢腸欲食未敢炊未及秋嘗羞祖禰
憶我春來歲方旱焦穗萎苗將槁矣
不意茲晨見精鑿此寶更將何物比
終歲勤勞農可念不耕而食余堪恥
歸買淞江雪色鱸持向高堂奉甘旨

省掖觀梅和宋草堂韻

玉肌瘦怯春風惱唇紅不褪香雲老
綺窓人靜月初圓笑覺飛璫顏色槁

羅幄銅瓶小几邊銀燈疎影硯臺前一株初破休輕折半朵猶含最可憐
宮妝近眼人爭愛却恐愁多零落快莫教纖手嗅東風誰盡生香與真態

西省海棠有序

山西陳則威以晉無梅花以管勾職初來江西卽求識之省左掖東檻有
海棠一小樹則威尤鍾愛之日數次至花下風雨昏暮不忍去也嘗索余
賦詩余時迫於案牘不暇舟行湘中梨杏桃李每得厭觀獨無海棠因賦
此補其缺云

山西公子虬髯客到處尋梅認香白春風省掖海棠開暫去還來拋不得
嗟我有癖常自笑不意逢君同此癖曉窓雲暖風日妍數朶娉婷春半拆
睡損紅綃膩有痕舞酣金殿嬌無力銀燈不如微月照珠簾更着疎烟隔
飛燕輕盈富貴姿玉環態度神仙格此日凝妝青瑣外當時擅寵沉香北
繁開似妬却冥冥半吐欲言終默默豈惟人愛亦自愛不獨春惜當誰惜
細雨重陰也看來莫對空枝慢相憶

千葉桃花并序

豫章氣候差早春未半花已岑寂省掖後苑有千葉桃一株人未之知也

衆卉已謝芳草如積偶與員外方君過其下初開數朶色韻標度殆非人間所有豈所謂瑤水之遺也歟繞樹百匝賞之以詩壬子二月十七日
江花先好還先落二月芳菲已蕭索掖垣一樹獨開遲嫩葉龍菴抱香萼
朝來小雨浥輕紅春色千重與萬重點注定知煩曉露剪裁寧不費春工
春來到處尋桃李不道東闌花自美傷心世事總如花何用勞勞行萬里

憶北山梨花并序

辛亥清明予與薛起宗聯騎遊北山飲酒大梨樹下時花盛開余有詠北
山梨花詩壬子清明備員江西省幕風雨兀坐案牘山積緬懷北山之集
邈如夢寐撫景感舊紀之以詩

去年清明花正繁騎馬曉出神策門千桃萬李看未了小逕更入梨花村
低枝初開帶宿雨高樹爛日迷朝暎柔膚凝脂暖欲滴香髓入面春無痕
青霞玲瓏翠羽亂白雪照耀瓊瑤溫折花對酒藉草坐花氣暗撲黃金尊
薛君起舞爲我壽勸我一曲招花魂須臾明月忽到樹主人送客唯畱髡
羅巾欹斜烏帽落醉眼况復知清渾村中至今爲故事笑我自是劉伶孫
我慚不答竊自慶大抵此樂皆君恩今年清明坐西省雷雨兩日如翻盆

羣花削迹淨如掃衆綠旣暗不可捫豈無青錢換斗酒案牘雜沓窮晨昏
佯來督責至訶詈面微發紅氣每吞未能搏搖跨鵬鶚詎免束縛同雞豚
人生屈辱乃淬礪百鍊正欲逢盤根自知力不舉一羽強欲扛鼎追烏賁
晚晴汲井試新火紫筍綠薤供盤餐歸來飯飽對妻子萬事反復何足論

壬子清明看花有感有序

熙寧五年壬子清明看山蘇公看花于錢塘吉祥寺金盤綠藍獻花者五
十三人有詩曰吉祥寺裏錦千堆前年賞花真盛哉道人勸我清明來腰
鼓百面如春雷打徹涼州花始開是其事也洪武五年基與員外方君看
花於西江省掖節值清明歲亦壬子去蘇公三百年矣歎公之不可見而
猶以誦公之詩也因賦長句以記歲月庶爲後三百年張本云

吉祥寺裏千堆錦綠髮仙人對花飲腰鼓金盤五色藍醉歸猶帶花枝寢
東風壬子幾清明三百年來寺已傾沙河塘上痴兒女猶誦錢塘太守名
看花我亦逢壬子況是清明非偶耳莫論南浦與西湖楚水吳山正相似
青蓮居士識前因金粟如來見後身總不能知塵外劫也須曾是會中人

敬方員外看花

金昌亭西萬株花胭脂玉雪爭紛拏春風携酒看花去騎馬徑到山人家
花深樹密無逕入下馬徘徊映花立紫萼風微翠袖香紅絲露重烏巾濕
別來幾負看花期客裏匆匆見一枝白下橋邊寒食後廣陵城外綠陰時
今年花最逢春早准擬清樽對花倒人意方邀酒伴來花枝已向東風老
花雖漸老仍堪折猶勝紛紛滿蹊雪且共芙蓉幙裏人坐看海棠枝上月
樟樹鎮舟中作

儂是吳淞釣魚叟全家生長吳江口遲鈍長飛衆鳥先迂疎每落諸人後
城中父老少相知鄉里兒童亦見欺几上細抄高士傳壁間大篆考槃詩
春風百草承膏沐強擲漁蓑親案牘胥史猶嘲吏事疎妻孥欲笑形容俗
羸馬長途恐不堪君恩何日許投簪半蓬秋雨烟籠水數點寒星月滿潭

聞鄰船吹笛

空江月寒江露白何人船頭夜吹笛參差楚調轉吳音定是江南遠行客
江南萬里不歸家笛裏分明說鬢華已分析殘堤上柳莫教吹落隴頭花

春江對雪

春雲作寒飛鳥絕花雨紛紛暮成雪江山最好雪中看况是東風二三月

披蓑漁立柳邊航戴笠僧歸竹外庄草暖尚迷雙鷺白樹寒先露一鵲黃
我愁春雪看難久重爲江山更回首莫煮清貧學士茶且沽綠色人間酒
登岳陽樓望君山

洞庭無煙晚風定春水平鋪如練淨君山一點望中青湘女梳頭對明鏡
鏡裏芙蓉夜不收水光山色兩悠悠直教流下春江去消得巴陵萬古愁
長江萬里圖

我家岷山更西住正見岷江發源處三巴春霽雪初消百折千回向東去
江水東流萬里長人今漂泊尚他鄉烟波草色時牽恨風雨猿聲欲斷腸
湘漢秋晴圖

讀書不願賢良舉朝醉霸陵暮湘渚兩鬢從添鏡裏霜十年聽遍江南雨
呼鷹臺上愛秋清鸚鵡洲前看晚晴紅葉蟬聲湘寺遠碧潭鴻影漢川明
湘波漢水愁無盡盡裏江山聊一哂舉世唯稱王仲宣當時亦有周公瑾

湘陰廟梨花有序

癸丑二月廿日泊舟湘陰廟下廟東圃有棠梨一株花猶未開因念辛亥
春與薛起宗賞花于鍾山之北賦詩酌酒爲一時勝集壬子歲宦居豫章

追憶舊遊嘗與員外方君道其事復有詩寄薛今年見花于湘水之上不
惟北山之會不可尋而豫章僚友亦相望數千里外人生漂泊蓋如是也
舟中岑寂賦詩一首且歸以示方君預與起宗締來歲之約云

平生厭看桃與李惟有梨花心獨喜海雪樓前雪一株歲歲清明醉花底
北山岡下花最盛千樹玲瓏圍綠水前年騎馬賞花處我與河東兩人耳
青苔滿地芳草合只有黃鸝映花蘂當時美人三閣上寶髻慵梳初睡起
鏡裏爭先試一枝真態欲將春色比樓空燕去花自落細雨黃昏淚如洗
疎籬蕭蕭茅屋破況復臨春開結綺我時賞花仍吊古花亦燦然爲露齒
歸來婆娑簪滿帽十日羅衣香不止去年相憶豫章城咫尺春江如萬里
今年邂逅洞庭曲細萼含愁照清泚人至魂消楚雨中花應腸斷湘烟裏
三年勝遊不再得百歲歡娛能有幾吉祥牡丹非舊夢玄都桃花亦如此
更約明年載酒來莫笑花前人老矣

祁陽行

黃鶴樓前漢陽雪岳陽樓前洞庭月自謂人間無此清到處相逢向人說
祁陽江頭春更佳彷彿似是神仙家黃鸝亂啼萬竿竹綠水縈抱千株花

千紅萬碧深相映，雞犬無聲茅屋靜。野老回頭喚不應，匆匆況是通名姓。
水流花落岸東西，只隔疎簾路已迷。天下于今皆樂土，何須更覓武陵溪。

皂角灘

煙蘿毵毵樹蒙翳，夏綠更換春花紅。千山萬山無所聽，鷓鴣杜宇啼春風。
穹崖瀾瀾高百尺，快劍無痕鑱翠碧。寶氣朝凝五色霞，丹光夜燭三分日。
我從章江出彭蠡，巴陵長沙洞庭尾。看遍衡廬兩岸山，行盡瀟湘一江水。
輕舸短楫辭零陵，似與亂石爭功能。牛刀慣熟中肯綮，郢斧神捷回鋒稜。
男兒性命固可惜，底事矜誇向羣石。鷗邊短草一枝筇，牛背斜陽數聲笛。

湘中四詠

黑翎紅嘴花間鳥，映花一點珊瑚小。當時如意擊東風，萬語千言啼未了。
雕玉籠開出繡楹，海棠庭院雨初晴。美人按拍教鸚鵡，學得霓裳四五聲。

石珊瑚

棠梨花開滿山白，白鵬飛來春一色。黃鸝紫燕太匆匆，不道花間有閒客。
却嫌香露污春衣，立向湘江映夕暉。鷗鷺相逢莫相妬，一雙還拂楚烟歸。

右白鵬

湘江兩岸無茅宇
湘竹陰陰覆江渚
春來未聽一聲鶯
只有鷓鴣啼暮雨
憐渠亦是他鄉客
苦向人啼行不得
縱教行得也消魂
那箇行人不頭白

右鷓鴣

暖風晴日融春晝
開看花陰難吐綬
綺縠都將綵羽粧
紅絲不待金針繡
疊疊胭脂縷縷金
龍紋盤錯鳳紋深
憑誰剪作鴛鴦帶
雅稱佳人翡翠衿

右錦雞

過高郵新開湖微雨有詠

殘紅曉落西陂岸
雨脚斜飛鷗鷺亂
扁舟盡日盡中行
荷葉荷花香不斷
船頭老翁一尺鬚
斗量菱角兼賣魚
兒能鼓柁女蕩楫
何用聰明多讀書

夢綠軒有序

卜其徐君幼文同謫鍾離結屋四楹
幼文居東楹余居西楹又嘗賦詩曰
夢裏綠陰幽草盡中春
水人家何處江南風景鶯啼小雨飛
花葢深有意於故園也因題其室曰夢綠

蜀山蜀山乃吳中山名幼文所居在焉
非西蜀之山也江頭萬章木細草
幽泉蔭修竹五月六月山雨晴空翠
紛紛滿衣綠杖藜或來陰下行雲影

不斷涼風生青連翠結欲無路彷彿上有黃鸝鳴去年吳城正酣戰却倚危樓望葱菁今年放逐到長淮萬綠晴於夢中見夢中見綠覺始知索我亦賦夢綠詩逢人說夢子堪笑替人作夢余何痴世間萬事同野馬覺後非真夢非假五色過眼本虛空富貴於人誠土苴南風剽然吹夢破樹頭不知微雨過從今寤寐俱兩忘靜與白雲相對坐

舟入蔡河懷徐幼文

憶初見君江浦外七尺長身齒含貝君年未冠復新婚錦帶吳鉤紫絲佩豪姿俠氣颯蕭爽春鴻輕便秋隼快結交梁楚燕趙間追慕廉蔭羞郭解誓將弓槩事鞍馬恥作寒儒服巾帶余時瑣屑箋蟲魚折几寒燈寫秋芥相逢一笑恍自失不異低岑仰高岱殺鷄爲黍三日談深中宵蔡入船舫方喜師君竟兄我卮酒動輒受百拜停觴爛熳出險語磔裂鬼膽窮百怪天然清真去雕飾王嬙西施洗鉛黛淑芳雋腴再三讀項上之櫛左手蟹螯癢礪棘互掎角十捷一二八九敗余實美君敏且博君亦憐余強而邁英雄敢誇君與我強弱不止楚敵蔡孟諸豪士渤海高季迪也時復峙足如鼎鵲高才於我十倍我尚歎追君力不逮縱橫千字賦生筆迭宕百韻

余公萊幼文與余唐卿作萊邁詩二百句世工僧房秋迴鉢聲長雪屋香
銷燭痕在清游未竟夕漏終落月殘星悲一概激烈正醉金陵酒漂泊共
泛濠梁載城荒地僻生計拙時脫春衫倩人賣破樓夜雨隣鐘急委巷秋
風茅屋壞斯時愁絕正難禁君獨相看勸余耐別來奔走向西洛面色瘵
鰥病新差章臺握手須臾立胸臆梗塞若有碍平生恥作兒女悲此別戚
戚若有槩今朝過蔡將入陳漸見舟艫離灘瀨平漪細石魚跳渚斜日低
煙雁橫塞相思無奈客中愁聊述長歌歌一再

鄭州道中

北風如刀吹面裂弊裘無功塵絮折星稀日出勢尚嚴滿袖霜花厚如雪
馬上沉吟苦憶家江南十月賸春華金錢晚菊低叢葉綠萼盤梅小樹花

寄題水西草堂

鴛鴦湖東武塘西桃花滿川蒲葉齊春風二月微雨霽鵝鴨拍水黃鶯啼
推窓只見參差柳柳色波光淡於酒烏紗官帽半籠頭紫竹漁竿長在手
平生愛讀內景書往往適意追禽魚開門懶迎俗士駕拄杖每叩高僧廬
客來舉酒邀明月細瀹松濤煮春雪但覺身無俯仰勞安知世有東西別

今年扈從來大梁錦袍白馬青絲韁信陵宅畔暮鴉集朱亥門前秋草黃
輪番夜直中書省霜華滿巾鬚髮冷粉署香銷紫綺袍碧梧影落黃金井
魂夢時時到草堂曲欄花藥漫分行他年得遂歸田計多種墻陰十畝桑

畱別楊公輔

將還滎陽夜集公輔東齋酒酣索詩時銀燈結花漏下二鼓賦此畱別
紫簾凝烟碧香繞銀燈結花金粟小主人捧酒起勸賓離別長多會長少
明朝騎驢鄭圃東白沙黃葉滿林風知君此際能相憶笑指燈花吹酒紅

送朱明善少府

胙城主簿冰雪骨天闊霜清見飛鵲家住西湖第一橋半生詩酒笙歌窟
斜肩兜子總宜舟名船九里松陰十里蓮松下看山船上宿小娃隨索賣
花錢鶯嬌蝶妬春如綺一夜東風變桃李回首梁園望故鄉咫尺吳山四
千里吳山漸遠音書絕兩髮青青未成雪烏帽朝辭鄭圃烟鹿車夜挽蘭
臺雪上官不憚路道長豈問富庶并荒涼正須到縣招竄匿要使枳棘皆
耕桑婦女養蠶男種麥食有雞豚衣有帛兒童不識成丁勞父老能歌縣
官德慙余亦是滎陽簿虎牢關下成臯路有酒誰澆紀信魂無人敢畫湯

溝渡鄭衛由來本懿親相思只隔大河津愁將良嶽風前柳持贈山陽笛裏人

梁園飲酒歌

我生之辰木入斗烏啼東井命壁守壁爲文府斗爲歲許我文章播人口
二齡能言學誦詩四齡指字識某某五齡琢句對虛實聯青儷黃配奇耦
客來當座賦短章四韻不待八叉手九齡六經已畢讀掩卷肯誦無掣肘
丰儀翩翩秋宇鶴顏色濯濯春月柳鄉閭每辱師長愛學校恥與兒童友
毫分縷析辯同異務植嘉穀去稂莠揮毫直欲五色爛倚馬未肯一字苟
龍蛇擬將赤手搏富貴謂可拾芥取文場馳騁竟一蹶鬢鬣局促俯其首
歸來焚膏坐長夜盥櫛不暇面塵垢淬鋒礪鏑期再策狐豕隳突羣兇吼
豈惟文運遭屯否無乃曆數厄陽九自慚定亂匪鉛槧束縛經傳事南畝
畊童樵稚課朱墨塗抹破硯掃幣帚東藩諸侯遂見徵白壁玄纁賁林藪
屢辭不獲始強起野服長揖坐談久青闥漏箭傳午滴紫幕爐薰散春牖
時翻玉檢題鸞鳳復賜銀箋篆科蚪鵬啼花落燕鶯飛頃刻浮雲變蒼狗
遷逐西行泣楚囚倉卒弗及拜慈母初移鐘離復入汴山路匍匐十日走

皮焦足胝汗浹踵手策羸蹇背有負囊資空乏衣破裂無以補綴謀諸婦
婦言別久簪珥空借舊乞隣無不有高堂姑老璽女幼日羞魚鰕買梨藕
恐無純帛禦姑寒安得吳綿爲君厚余聞愧赧雙臉赤灑淚出門心欲朽
病軀有僕不得將藥食扶持賴親舊寒沙古壘泣英靈落日疎林嘯猿狖
前途尚遠節屢換白露應候月在酉榮枯萬變類觀奕憂憤百結如錯鈕
筋力衰頽卧猶倦鬢髮頽白照逾醜盡將得失付忘言且醉梁園一樽酒
惜昔行贈楊仲亨

嗟我憶昔來臨濠親友相送妻孥號牽衣上船江雨急辟歷半夜翻洪濤
濠州里長我所識憐我一月風波勞呼兒掃榻妾置酒買魚炊飯羞溪毛
酒酣話舊各涕泣隣里怪問聲嘈嘈明朝府帖促葢屋旋斲瓦礫除蓬蒿
大竹爲楹小棖桶覆以菅草并索綯君時亦自長干來爲我遠致書與袍
密行細字讀未了苦語淅淅如蠶繅收書再拜問所歷燈影照夜吳音操
異鄉寂寞遇知己歡喜豈止餽百年藤蘿繞互依附濡沫相潤脂和膏
薰風晝眠竹几靜落葉夜掩柴門高黃鸝爲汲東井水翠袖或送西家醪
中書大官捧檄下霜鵲脫銕鷹解條君前况輔我後策步險攀峻隨猿猴

饑腸午渴掬澗飲甘滑不啻青葡萄到家倉卒席未暖復此赴汴同
崖高水澁石溜急時復著力撐長篙予生有弟皆異域漂泊幸與君逢遭
君才自是伯者佐比擬管樂卑蕭曹方期補剿拯焚溺詎肯析利窮秋毫
比來縣邑久蕪廢亦有桑柘粗梨桃遺民可鳩業可復應屈君輩揮牛刀
他時解綬歸故里相期結居吳江皋

君莫疑贈薛起宗

有弓莫朝射有劍莫夜舞舞劍空驚半夜雞射弓須射南山虎當年意氣
雙白虹三尺寶劍兩石弓平沙軟草馬蹄疾仰面射落南飛鴻歸來面皺
頭雪白魚皮包劍弓挂壁逢君一笑杯酒空憐我衰顏手無力手無力眼
有眵作歌贈君君莫疑英雄老去衆所薄何獨區區楊去非先生年五十
更名曰去非

芋隱爲句曲山人翟好問作

種桑百箔蠶種芋千匹布先生種芋不種桑布作衣裳布爲袴桃花雨晴水滿
塘烏紗白芋春風香野樵山葛不敢並越羅川錦爭輝光兒童漾紗婦紡
織賣布得錢還買帛黃綿大襖一冬溫白雪中單半襟窄今年芋好畝百

舫堆場積圃長輪困床頭白酒夜來熟殺雞煮鴨邀比隣東家種桑青遶屋官絹未輸空杼軸婦姑相對歎無衣先生飯飽方捫腹

舟抵南康望廬山

春山如春草春來無不好况是香爐峯百疊屏風圍五老嚶嚶歷歷谷鳥哀朱朱粉粉山花開芙蓉削出紫霧上瀑布倒瀉青天來船頭春山重回首世上虛名一杯酒李白雄豪妙絕詩同與徐凝傳不朽明日移舟過洞庭蘭花斑竹遠沙汀摩挲老子雙愁眼細看君山一點青

登繩金塔望廬山

過魯必謁岱入洛須望嵩嗟余夜半入彭蠡月黑不見香爐峯明登望湖亭雨氣何空濛山僧指點笑五老正在煙雲中今朝躡層梯高標揭晴空匡廬遠出百里外紫翠映帶春霞紅雖云彷彿見顏色已覺浩蕩開心胸在山看青山佳處未盡逢不如迴翰兩腋乘天風不論雨雪與晴霽回翔下上飽玩八面青芙蓉

癸丑元日

霏霏元日雪脉脉人日雨春來無日不輕陰薄霧寒雲滿南浦常年有雨

復新晴淑氣韶光淡遶城草色未
兼冰雪忘卻春幡慶春節野杏絨
卜大通且須祈穀問年豐相期十
二樓前月賸看花燈萬點紅

憶左掖千葉桃花

穠李積皓雪繁桃炫朝霞江邊日
能傾國千瓣玲瓏誰剪刻半吐疑
紅卻勝紅全開似白元非白旁雖淺淡
正復濃雅麗稱月間宜風陰時晴
午各異態噴喜笑噴無不工嗟我匆匆
簿書急時夜微吟對花立白苧猶
沾夕露香青鞋不怕蒼苔濕而今漂泊
楚江濱想像丰儀一愴神惆悵當時
看花客對花還說去年人

贈秦侍儀

文采玉娟娟班行內外聯蕃王從
學拜邊使候通箋侍立彤庭上追趨法
駕前今朝退朝早衣上有爐煙

宿高季迪京館

歲晚此相逢鄉情似酒濃語長銷
夜燭夢短及晨鐘急雪風鳴葦微雲月
照松雞前趨闕去寒樹曉籠葱

江村雜興十三首

春墅一鳩啼橋危懶過谿徑苔都上壁野菜不分畦倚杖妨花密看山碍竹低欲知幽隱處風雨白門西

陋巷泥三尺無人訪隱淪窓鳴風減睡炊斷雨添貧野路花迎客江橋柳送人暫須依薄俗憩此竄餘身

春色冶城東花濃笑老翁燕遲雙壘破蜂早一房通薄暝山腰雨疎紋水面風便携簑笠去垂釣綠蒲中

判醉望愁醒愁因醉轉增已歸仍似客投老漸如僧詩興風樓笛棋聲雪舫燈莫言渾不解此事野夫能

東瀼復西圻村村可釣磯草於煙處密花較雨前稀小管催鶯出疎簾待燕歸傷心新柳色猶妬舊羅衣

偶因辭祿去聊傍葦邊居瓢棄頻賒後衣存屢典餘晚簾花掠燕春水絮吹魚復恐沙崩石楊栽插遶廬

江橋春別後沙舸獨歸時鵝鴨東西宅菰蒲遠近陂藕深荷蓋密竹瘦筍鞭遲野趣誰能識唯應白鷺知

斜檻俯江湍，輕帘盡小竿。柳寒鶯羽濕，花暖蝶鬚乾。酒或臨流酌，詩多寫石看。不因迂僻地，那得此身安。

江影搖春樹，潮痕摺晚沙。綠蕪三尺雨，朱槿一籬花。去國仍思國，還家復夢家。自無干祿意，何必遠京華。

將雨山光黑，初晴樹色青。賣薪沙店遠，占穀瓦甕靈。石枕支頤冷，江瓢漱齒腥。醉餘春睡熟，長得鳥呼醒。

江月盈盈白，墟煙細細陰。茅茨孤碓急，機杼一燈深。短笛多悲調，長歌少醉吟。自憐知己盡，空負壁間琴。

清流曲幾回，喫飯此山隈。歌斷憐鶯續，詩遲畏酒催。晚晴初見月，春盡尚逢梅。歸路緣江熟，支筇不用陪。

情深却倦遊，矮屋任低頭。花落東風怨，鶯啼夜雨愁。酒煩隣媪買，詩許社僧求。欲駕東家鶴，吹笙到十洲。

句曲秋日郊居雜興十首

茅屋人歸後，荒村更異鄉。樹寒烏遶月，江冷雁啼霜。影賴燈相續，愁緣酒在忘。明朝覽青鏡，白髮幾多長。

出門山氣夕循逕入谿陰野水經寒淺秋風到晚深草潛驚鶻兔莎露啄魚禽自采黃花嗅誰知獨步心

漸老愛秋光升沉意兩忘雁聲偏到枕蟲響故依床薜荔干林雨芙蓉一樹霜故園叢菊在衰颯爲誰香

庭樹聚棲鴉溪流沒淺沙瘦憐人似菊濃愛葉如花秋色都連水寒雲忽變霞自慚長在客無地不思家

牕掩輝輝竹爐消細細香無風寒尚淺有雨夜偏長饑鼠搖空囊枯螢委破囊十年江海夢此夕詎能忘

地與華陽近三峯獨往來草香千品藥松老一身苔書怪慣偷讀門經鹿撞開牆東有修竹移向北庭栽

編竹補疎籬生芻束酒旗雞豚田祖廟鷹犬獵神祠玉糝菰爲粉璠酥豆作糜兒童採蘆葉爭學短簫吹

欲往竟無適意行仍獨還猿聲黃葉寺牛背夕陽山書棄將成業身投未老閑相逢莫嘲謔才與不才間

偶隨黃蝶去岸幘樹邊橋卯酒紅初散朝霞白漸消沙平謂雁跡水落見

魚苗却愛箕山老從容棄一瓢

落葉擁柴扉村深客過稀曉車分轂去晚笛飯牛歸漁負雨蓑立烏銜霜
果飛此中真小隱予亦久忘機

栢師文

白髮已千莖相逢喜氣生看山畱十日待月坐三更秋前槎頭釣春泥谷
口耕莫言踪跡闕朝市久知名

翟好問

愛爾山城隱柴門對縣衙酒貲千畝孖生計一園瓜雨步荷巾濕風吟蓆
帽斜時時扶短杖看竹到東家

送句容劉少府回揚州

家具一車輕囊書與短檠吏多難別意人有去官情帆影江沉寺簫聲月
到城竹西尋舊業烟雨綠蕪生

沙河舟中

旅懷歸正急春色到非遙草際風初汎蘭心雪未消鷺明欺白髮鵬快避
輕槳得遂歸田計殊恩感聖朝

瓜洲逢丘克莊

江水靚如空江華冷未紅憐予猶客裏美汝已鄉中白苧青衫雨烏紗短
帽風不須搖艇子垂釣五湖東

至鍾離發書寄婉素

漂泊嗟吾遠支吾賴汝賢老親思饌肉癡女憶衣綿刀尺帖聲裏燈花笑
影邊聊將千里夢持送到金川

舟中聞促織

促織來何處哀吟近短篷不堪爲客裏沉復是舟中殘夢寒衾月孤燈夜
枕風此時腸欲斷恨不耳雙聾

哭陳仲野都事沒任所

興縛暗風沙丹旌映晚霞吏人營殯殮童僕着衰麻襲廕無遺嗣招魂有
外家重來恐迷處記取路三叉

立夏前一日有賦

漸老綠陰天無家怯杜鵑東風有今夜芳草又明年蠶熟新絲後茶香煮
酒前都將南浦恨聊寄北窓眠

東湖晚眺

漚沒岸如無涼多柳易枯
巫歸神廟靜兵語驛亭孤
日落霞明渚虹收雨暗湖
此時篷底坐天盡是東吳

沙河至采石二首

河曲帆頻轉波高夢屢驚
學人孤拜月照骨鬼吹燈
斷甃沉沙嘴殘碑露石稜
不知何縣邑芳草沒荒塍
舟中逾一月驛路及三千
老淚青衫上新愁白髮前
留聲秋岸雨鴻影暮河煙
不有西征客誰同此夜眠

岳陽樓

春色醉巴陵闌干落洞庭
水吞三楚白山接九疑青
空闊魚龍舞娉婷帝子靈
何人夜吹笛風急雨冥冥

入永州

石氣陰才霧嵐霏暖欲霞
憩床腥畏虎飲礪毒防蛇
紅葉秋崖樹青蘿晚洞花
江山盤屈外遙認兩三家

零陵

古瓦籠山葛荒碑仆石楠江晴初漲雨城午未銷嵐甕富鯖羞鹿杯渾酒
餉蚌邦人盡麻泉終歲不知蠶

湘中雜言四首

鄂渚雲歸後巴山雨過時鵲啼湘女廟花落楚王祠家遠身如夢愁多鬢
易絲聊將身暫泊沙嘴看鷗鷺
飄裊一湖香青青杜若長花迎衝浪楫燕逐使風檣欲采蘭爲佩仍褰荔
作裳何如山閣上屏裏看瀟湘
城近江臨郭沙虛月在川柳宜春雪後花怯晚風前野爨三家市鄉音幾
處船坐聽磯下水嘈雜響湘絃
指點鷗飛處人間是岳州湘潭山亂出江漢水兼流深竹新祠宇飛花舊
酒樓平生已楚夢明日洞庭遊

八月九日祀社稷述事

祝史祝王冊儒臣奉誓詞衣冠陳盛典相宅降洪釐用如金穰瑞仍祈雨
露私勾龍嚴配位神棄肅明祠幣玉趨宗伯笙鏞奏瞽師精靈潛格爾彤
蜺儼來思赤壤新封國玄牲舊制儀豈惟宜且土穀還得奠邦畿師出常依

主君行每告期禮終受多祐民物正熙熙

奉天殿早朝二首

雙闕翬飛紫蓋高日華雲影映松濤萬年青擁連枝橘千葉紅開並蒂桃
仗以玉龍銜寶玦珮將金兕錯銀刀乍晴風日忻妍美闔殿齊穿御賜袍
錦襜繡帽列金盂玉節龍旂拱翠華甘露欺霜凝紫液卿雲如蓋結丹霞
鶯聲近隔宮中柳駿騎遙穿仗外花聖主直教恩澤遍香羅先到小臣家
雪

欵欵整整復皚皚可是春水細剪裁到處江山皆玉立誰家庭院不花開
幾回旋繞還飛去半餉悠揚却下來獨有梅邊易消滅也應和氣近蓬萊
上馬

晴來未覺是春朝已有東風着柳條雪自堅牢盈尺在水纔輕薄一邊消
不愁霧暗看花眼且倩人扶上馬腰却憶探春湖上路小紅船子木蘭桡
感春

茂苑東風散鼓鼙草堂近在柳營西春衣禁酒聊存着詩句懷人每謾題
花有底忙衝蝶過鳥能多慧學鶯啼閒身準擬看山色又復朝叅逐馬蹄

晚春 三首

旌旗獵獵繞高城，曲水飄香出繡楹。
雨頡風頡枝外蝶，花遮柳映樹頭鶯。
乍籠紗幘羞容老，試着羅衣覺體輕。
猶憶醉歸湖上路，滿身飛絮馬縱橫。
宮樹參差帶苑牆，暖塵兼霧撲衣裳。
新蒲細柳皆春色，紫燕黃鶯欲斷腸。
沽酒客來花未落，祓除人去水猶香。
老懷無復登臨賞，坐對鍾山到夕陽。
辛夷如雪燕庭柯，老去愁驚日易過。
芳草漸於歌館密，落花偏向舞筵多。
故人別後皆黃土，南浦春來又綠波。
便欲移家勾曲住，採芝種玉此山阿。

寓江寧村居病起寫懷 十首

落梅風急晚蕭蕭，病起愁驚雪盡消。
卮酒不添前日量，帶圍初減舊時腰。
高樓錦瑟花連屋，深巷珠簾柳映橋。
淮擬青鞋踏春草，看他翡翠戲蘭苕。
病體支離倦裹巾，偶因行樂見陽春。
梅緣無恨尋常瘦，柳故多愁日夜蠶。
夢裏笙歌隨騁馭，畫中羅綺繡麒麟。
相期欲就吳姬飲，却恐江花笑客貧。
性懶逢春睡轉昏，曉鶯多在夢中聞。
故人錦字憑誰寄，學士銀魚每自焚。
布穀雨晴宜種藥，蒲蒲水暖欲生芹。
相思未信蓬山遠，只隔江東一片雲。
翠盡吳山是楚峯，一緘芳信託歸鴻。
丁香暗結盈盈露，荳蔻微含細細風。

春水染衣鸚鵡綠江花落酒杜鵑紅此身曾是登瀛客未信扶桑弱水東
不知殘雪是春光起見輕雲覆野塘春草春江相妬綠新鶯新柳鬬爭黃
囊無太史新頒曆衣有容臺舊賜香但使清尊花底醉任教白髮鏡中長
東風拂柳軟婆娑野鳥啼春聽未和世事不隨人意好雨聲偏爲客愁多
回文絮小香如蟻凹面杯深酒勝鵝一帶春江皆碧草却愁無地着漁蓑
醉舞狂歌四十年老來參得一乘禪東風未濕牆腰雪細雨微添石眼泉
無數白鷗開似我一江春水碧於天莫言笠澤非彭澤定擬金川是輞川
坐對青山覺眼明山應憐我眼偏青一官不博三竿日萬事無過兩鬢星
花底蛛絲迷蛺蝶草根蝦族變蜻蜓文章無預封侯相莫向人誇識一丁
十里吳堤踏暖塵老懷忽憶故鄉春泥金孔雀裁歌扇刻玉麒麟壓舞茵
翠袖錦箏邀上客畫船銀燭照歸人而今白髮東風裏疑是前身與後身
門外春泥一尺深窓間雲氣十分陰寒飈溜雨袞如鐵濕竈凝烟火似金
酒解驅愁時強飲詩多感舊懶長吟貧家不願千金粟但得陽烏照晚林

新柳

濃如煙草淡如金濯濯姿容裊裊陰漸軟已無憔悴色未長先有別離心

風來東面知春淺月到梢頭覺夜深惆悵吳宮千萬樹亂鴉疎雨正沉沉

春草

嫩綠柔香遠更濃春來無處不茸茸六朝舊恨斜陽裏南浦新愁細雨中
近水欲迷歌扇綠隔花偏襯舞裙紅平川十里人歸晚無數牛羊一笛風

江畔尋花偶成二首

細草平沙暖更融謾隨蝴蝶步東風衰髯照水疑添白老眼看花覺厭紅
且自細聽鶯宛宛莫教深惜燕忽忽江村到處皆春色聊與行人吊客中
偶隨流水到花邊便覺心清似昔年春色自來皆夢裏人生何必盡樽前
平原席上三千客金谷園中百萬錢俛仰繁華竟陳迹野花啼鳥謾留連

用前韻書事

春來不到鳳凰坡辜負江頭白苧歌輕薄衣裳宜換袂軟紅泥土不沾靴
鶯綠夢短嗔啼早雨爲花疎厭聽多只恐新晴便零落南風吹老樹陰蘿
春日白門寫懷用高季迪韻五首

得歸雖喜未忘悲夢裏愁驚在別離尙短柳如新折後已殘梅似半開時
江雷殷夜蟲蛇早山雨崇朝蛺蝶遲製取烏紗籠白髮免教春色笑人衰

柴門斜對曲江頭。農具漁罾晚自收。細雨短莎寒似臘。淡煙新柳暝如秋。
鷗能來往緣曾識。鶯或丁寧解說愁。回首故交零落盡。更將詩酒與誰遊。
綠髮無多白髮長。謫居還復是他鄉。風初晚佩倚蘭弱。雨滴春蔬早韭香。
碧柳五株千本菊。黃牛十角一羣羊。得閑隨地爲農好。不獨長安與洛陽。
遠歸偏惜窳餘身。多難番爲異姓親。前度劉郎非故物。當時燕子總西隣。
家貧母老難爲客。酒薄愁深不醉人。走向津頭看春色。綠波芳草却傷神。
綠蕪迷渚水漫沙。斷岸無舟路轉賒。細柳已黃千萬縷。小桃初白兩三花。
烟中晚棹兼漚遠。雨裏春旗趁景斜。野趣莫嫌渾寂寞。近來沙嘴有人家。

春暮有感二首

春色鮮明不稱貧。越羅川錦照烏巾。斜陽芳草遲遲晚。流水桃花去去春。
萬里歸心漚送客。片時閑夢鳥催人。五湖風雨烟波闊。便着青蓑採白蘋。
啼鳥匆匆變物華。雨池科蚪漸成蛙。青鞋謾踏閒邊草。白髮羞簪醉裏花。
此日驂騑思首宿。當時鸚鵡喚琵琶。遙憐簫鼓追遊地。薺麥青青已沒鴉。

漸老

漸老無營萬慮沈。鶯聲喚起向來心。春風頗似唐張旭。天氣和如魯展禽。

結客每酬雙白璧，纏頭曾費萬黃金。短筇消得江村路，步步薔薇綠樹陰。

。禽李仲弘寫懷次韻

休對清江嘆逝波，且拋簪珥著漁蓑。愁邊卮酒歡娛少，老後文章感慨多。
燕子綠蕪三月雨，杏花春水一羣鷄。聊將白髮歸來意，總和東風懊恨歌。

。寄張學錄孟兼揭應奉孟同二文學

何用聰明萬卷書，白須卑陋一廬居。草於閒處生偏密，花到春深看漸疎。
綠水滿渠澆藥後，青山無數卷簾初。相過莫道柴門窄，細柳高槐可蔭車。

雨中獨坐有懷榮陽道中用寄潛齋夜坐韻

山色秋光澹遶齋，雨聲蟲響互悲哀。清尊憐我攻愁去，白髮欺人送老來。
江柳淨無餘葉在，渚蓮遲有一花開。馬蹄却憶成臯路，野燒西風滿面埃。

早秋江墅晚步

秋前秋後十日雨，村北村南千頃麻。晚渚芙蓉輕落片，午前秔稻細含花。
仙翁蠟屐高中幘，溪女銀釵小髻盤。老我不知官府事，水邊吟到日西斜。

。梅杏桃李

落莫香魂繞舊宮，詎知色相本來空。笛聲黃鶴高樓上，詩句孤山小店中。

曉樹煙霜千萬點晚籬松竹兩三叢相思只尺憑誰寄目斷天南字字鴻
右梅花

當時庭館醉春風客裏相逢意轉濃只恐胭脂吹漸白最憐春水照能紅
一枝爭買珠簾外千樹遙看小店中惆悵先生歸去後江南煙雨又濛濛
右杏花

深深翠竹映嬋娟湘女梳妝立曉烟流水落花成悵望舞裙歌袖是因緣
也無人折休相妬纔有鶯啼更可憐却憶東關碧千葉暖風香雨爲誰妍
右桃花

憶與盧仝共看來花光月色兩徘徊江村遠處長相識風雨寒時已早開
霽雪玲瓏愁易濕春冰輕薄笑難裁江城二月城西路誰惜柔香滿翠苔
右李花

寄諸葛同知彥飛

白髮慵梳步履遲老於田野最相宜每當酒熟花開日正值身閒客到時
雪屋夜燈因婦織月波秋舫爲僧移而今此樂同誰說只有鄉人馬遠知
哭高季迪舊知

鸚鵡才高竟殞身思君別我愈傷神每憐四海無知己頓覺中年少故人
祀托友生香稻糲魂歸丘隴杜鵑春文章穹壤成何用哽咽東風淚滿巾
豫章早春

茸茸草色變枯荻簌簌寒梅落逕苔山頂雪惟朝北在水邊風已自東來
不須銀管催鶯出便好珠簾爲燕開見說嶺南春更早桃花流水勝天台

浦口逢春憶禁苑舊游

春水消盡草生齊細雨香融紫陌泥花裏小樓雙燕入柳邊深巷一鶯啼
坐臨南浦彈流水步逐東風唱大堤還憶當年看花伴錦衣驄馬玉門西
。省垣對雨有懷方員外

煮得新醅艷艷紅省垣誰與晚樽同人當暫別情偏惡詩到無聊語更工
江浦荷花雙鷺雨驛亭楊柳一蟬風論文若到虞楊地應對清江憶范公
立秋日懷方員外

幾日西清晝掩屏綠塵幽蘚遍閒廳病中事少翻嫌健醉裏愁多只願醒
快響閤鈴飛夜鵲偶攤書卷落秋螢萍蹤已辦東南別風雨長更各自聽
七月三十日祖母初度時年八十九

白髮青瞳壽者身每逢佳節話咸淳百年未盡四千日來歲還週九十春
遷客無家空望拜孤臣有表竟誰陳今朝風雨茅茨底應對兒孫說遠人

謁小姑娘廟

月帔星冠敞翠屏白腮紅頰兩看青魚鱗小殿波紋滑龍尾長旗雨氣腥
巫女沉牛歌宛轉彭郎回馬拜娉婷蘭舟願祝東風使一夜爽猶過洞庭
。晚泊湓浦逢冷節

小雨籠陰護晚霞柳邊停棹聽啼鴉湖光已綠皆春草風信猶寒是杏花
到處青鞵隨蛺蝶誰家紅袖泣琵琶匆匆客裏逢佳節那得行人髮不華
。舟中聞隣船吳歌有懷幼文來儀

輕帆短檝泝煙波疊渚回舟奈遠何一路詩從愁裏得二分春向客中過
江通漢水晴偏綠山入湘雲晚更多何處思君腸欲斷楚妃祠下聽吳歌
途次感秋

娟娟西風吹逝波冥冥灝氣逼星河宣王石鼓青苔澁武帝金盤白露多
八陣雲開屯虎豹三江潮落見鼉鼉沅湘一帶皆秋草欲采芙蓉奈晚何
祁陽道中見海棠

桂陽江口望祁陽疊疊樓雲入渺茫高樹綠陰千嶂濕野棠疎雨一籬香
縱無春在猶回首況有鶉啼合斷腸惆悵東湖堤上柳暖風輕絮正悠揚
客中寒食有感

減衣時節尚寒天暫倚東風泊畫船十里樓臺仍細雨五侯池館又新煙
且簪楊柳酬佳節莫對桃花憶去年總是無情也腸斷鷓鴣聲裏又啼鶉
桂林卽興

曾見重華巡狩來離江廟宇野棠開山無檜柏皆岩穴地有芝苓盡藥材
花布短衣齊膝製竹皮長帽覆眉裁也應風土交州近丹荔紅椒不用栽
舟次邵白有懷徐幼文

文章小技恥雕蟲也逐羣才赴洛中多病不宜秋色裏相思只在暮江東
雞豚籬落茅茨雨鳬鴨陂塘菡萏風欲買一樽澆寂寞傷心不與故人同
清明懷故園

縷縷輕煙細細風秋千池館萬家同高低草色相參綠深淺桃花各自紅
人意盡隨流水去風光都在笑聲中多情白髮并州客坐對西南雪滿峯

春日山西寄王允原知司

五首○并序

并州春半無花可賞追憶舊遊情動于中因賦長句五首公退之暇詠而
味之庶幾春色之在目也允原知司善詠詩者就錄以贈

十里煙光濕翠苔二分春色到花朝無人快擊華奴鼓有伴同吹弄玉簫
遍地錦圍歌處席滿身珠壓舞時腰莫嗔老子疎狂甚曾醉揚州廿四橋
藥苗初茁水生葍老麝收香鹿養茸二月春光纔霽雪一番花信又顛風
參差鸚鵡全身白淺淡棠梨半面紅正是江南寒食近滿簾飛絮雨濛濛
盡船搖槳蕩晴波步障圍風踏軟莎簫鼓隊衝黃鳥散綺羅人比白鷗多
不知酒與愁成敵長恨花爲病作魔回首六橋青草徧水光山色近如何
花時無處不黃鸝偏到垂陽着意啼人立晚風携便面馬臨春水惜障泥
踏歌趁拍催腔急旋舞回身應節齊遙想故山行樂地紫苔侵遍十年題
一莖白髮已堪嗟况是東風兩鬢華醉裏誤將裙作紙老來羞以帽簪花
疎狂不識看雙結敏捷曾經手八义閒喜日長公館靜自分新火試新茶

無題和唐李義山商隱

嘗讀李義山無題詩愛其音調清婉極其穠麗然皆託於臣不忘君之
意而深惜乎才之不過也客窓風雨讀而悲之爲和五章

一瓣芙蓉是綵舟。棹歌離思兩夷猶。風鬟霧鬢遙相憶。月戶雲窓許暫留。
波冷綠塵羅被曉。恨添紅葉翠顰秋。雙鸞鏡裏瑤臺雪。任是無情也上頭。
纔向瑤臺覓舊踪。曙鴉啼斷景陽鐘。薄施朱粉妝偏嬌。倒插花枝態更濃。
立近晚風迷蛺蝶。坐臨秋水亂芙蓉。多情莫恨蓬山遠。只隔珠簾抵萬重。
細骨輕軀不耐風。春來簾幙怕朝東。人間玉宇三山隔。天上銀河一水通。
看暈淺顰橫曉綠。臉銷殘纈膩春紅。水絃莫奏清商曲。滿地霜華泣翠蓬。
夜合花邊待月來。宮中輕轆響春雷。笙調恨譜參差度。錦織愁紋宛轉回。
樓上綠珠知報主。座中紅拂解憐才。傷心兩炬緋羅燭。吹作銀荷葉下灰。
爲雨爲雲事兩難。蕙心蘭質易摧殘。爭移錦柱秋先斷。漏滴銅壺夜不乾。
羅幙有香鶯夢煖。綺窓無月雁聲寒。芙蓉一樹金塘外。只有芳卿獨自看。

長沙雜詠 三首

花深衆禽寂。格格啼山鷓。橈響一燈來。人歸碧湘夜。
筠嶼烟長碧。蘭坡水自香。只宜行畫裏。忘却在瀟湘。
湘人愛樓居。斜枕湘江起。樓下倚闌人。簪花照春水。

遇史克敬詢故園克敬自長洲來因詢吳中風景大異往昔賦此

以寓鄉里之思云

二年身不到姑蘇見說城邊柳半枯縱有蕭蕭幾株在也應啼殺樹頭烏
贈京妓宜時秀

欲唱清歌却掩襟晚風亭子落花深坐中年少休輕聽此曲先皇有賜金
憶挹翠亭聽歌示徐幼文余唐卿

清歌一曲動梁塵只憶當時淚滿巾何況春歸花落盡眼前漂泊兩三人
夢故人高季迪二首

辛亥八月十八夜夢與季迪論詩已而各出詩藁互相商確季迪在吳時
每得一詩必走以見示得意處輒自詫不已夢中抵掌故態如常時因賦
二絕季迪且索其舊作云

詩社當年共頡頏我才慚不似君長可應句好無人識夢裏相尋與較量
驚人新句嘆無前故態疎狂似少年便寫錦囊三百首爲君披咏步涼天

舟泊南湖有懷二首

二月十二日舟泊彭蠡南湖嘴風雨甚寒憶吳中是日郡人皆試夾紗衣
單羅扇往范家園看杏花入春來此爲行樂之首

紗衣羅扇一時裁兩兩三三作伴來正是吳中好風景范家園裏杏花開
單羅小扇夾紗衣冠子梳頭挿翠薇知是范家園裏醉無人不戴杏花歸

到江西省看花次韻四首

青絲茵褥是柔莎白亭衣裳勝綺羅千樹桃花紅一色春光誰道不須多
小小旗亭曲曲闌禁烟時節未鶯殘便須連夜燒銀燭莫待他年霧裏看
東湖東畔柳枝長滿苑飛花亂夕陽何處被除兒女散過來流水鬱金香
生色屏風一面開輕羅團扇合歡裁深深院落青青柳縱是無花也看來
鯉魚山阻風天甚寒雨皆成霰

望武昌二首

吹面風來杜若香離離煙柳拂鷗長人家鸚鵡洲邊住一向開門對漢陽
春風吹雨濕衣裾綠水紅妝盡不如却是漢陽川上女過江來買武昌魚
岳陽阻風

二湘風雨五湖春萬里相思一病身能向此中魂不斷更無愁處可愁人
祁陽道中二首

疎煙小雨濕流光愁得楊花不暇狂半晌春晴便飄蕩
人簾幙上人床
愁紅怨白滿江濱一樹盈盈恰破春正是情多開自晚
雨中知有斷腸人

潭州雜懷

桃花深紅杏花白紅白花開弄春色東風一片落衣裾
腸斷江南未歸客

登宋宮故基

上皇宮殿碧參差嗟我來登見廢基盡道河邊金線柳
腰肢猶似李師師

集外詩十首

舟中聞春禽寄江陰包鶴洲

山中無音樂絲竹在禽鳥嚶嚶呼春晴嚶嚶報春曉
嬌吟與柔吟圓滑鬪新巧知君在山中樂此長不少疎籬密竹外深澗綠樹表青鞋踏花影信步聽未了歸去聞筆聲應怪銀甲小我來行一月風雨春江渺今朝豁晴霽孤琴破幽悄鏗如女媧笙忽作餘音嫋平生黃鍾耳直欲辨分秒萬事付松風翛然坐秋草

觀宜春侯旋師

瘴地收蠻後煙江棹槳過旌旗皆繡虎鼓角半吹螺聖化方無外民心詎

有訛馬循歸路熟人比去時多喜氣浮三峽軍聲動九河遙知雙闕下齊
進太平歌

詠冰

連日毒熱思冰不可得因賦五言一首素箴庶幾詠冰解暑不啻望梅止
渴仍邀來儀季迪幼文三公子同詠

凌室啓深藏殊恩賜上方壺清迷練色甌薄耀寒光當座人俱素登筵體
共涼瑩含銀潔甘薦蜜脾香淺碧迎歌扇微紅映舞裳明愁難作鑑堅
恐易成漿瑞擬金窓雪勳高玉井霜屏慚雲母熱簾啗水晶長醉客狂思
踏詞臣渴願嘗陳王方避暑突兀殿中央

燈夕觀妓戲作艷語

舞緩態偏濃歌停拍未終釵畱人勝雪釧響壁羅風不盡眉長綠非酣臉
自紅意將回眼送嬌逐點頭通此夕瑤臺下當時洛浦中莫言常見慣腸
斷杜司空

上巳

煖日風雩好晴江被袂過徑穿花底窄春向水邊多穠艷羞桃李輕軀稱

綺羅髻搖金婀娜鞍覆錦盤陀曲浪畱紋羽義峯進紫駝遊人傾巷陌啼
鳥避笙歌坐障陰圍柳行茵軟藉莎漱酣香泛清滌器膩浮波富貴唐天
寶風流晉永和暮歸車馬開珠翠落平坡

小孤山圖

徐貴畫代莘野賦

江流西來如箭急小姑橫截江心立桃花水漲勢相爭峽口瞿塘猶不及
山神堂堂心膽竊當時人間偉丈夫江頭廟裏青綾帳翠簾金釵塑小姑
西園梨花春晚開一枝

明日是清明孤花雪鬪輕不須開滿樹春少更多情

春盡又開一枝

深院閉青苔黃昏獨自來花應憐我意特放一枝開

春夢二首

春夢復春夢春夢有誰醒昨日梨花白今朝杏子青
春夢復春夢夢好不知春只有雙蝴蝶憐他夢裏人

列朝詩集

甲集第八

張司丞羽靜居集樂府五七言古詩一百四十首

張司丞羽

羽字來儀以字行更字附鳳潯陽人既壯從其父宦游沂江踰湖受易于山陰夏仲善爲文學歐陽子鎮密宛轉雖前輩自謂不及也兵阻不得歸因僑武林來吳喜吳興山水與徐資約卜居家於戴山之東元末授安定書院山長國初舉賢良不出徵起廷對稱旨擢太常司丞兼翰林院同掌文淵閣事十六年上親藻滁陽王事實命來儀換廟碑當時以大制作推任如此以事竄嶺表未半道召還抵京信宿知不免自投龍江以死年五十二十八年之六月也歸葬九里岡儒學教授金華童冀爲銘有靜居集六卷吳人張習曰國初以高楊張徐比唐之四傑故老言不惟文才之似而其攸終亦不相遠蒼菴盈川令終如一太史之斃同乎賓王北郭雖不溺海僅全要領而非首丘先生投龍江又與照鄰無異噫亦異矣程孟陽曰靜居五言古詩學杜學常各有神理非苟然者樂府歌行材力馳騁音

節諧暢不襲宋元格調習菴樂府尙多套數語不若靜居才力深渾有自得處七言律詩清圓渾脫不事綢繆全是唐音頡頏高揚未知前後或謂揚不如高又謂張徐不及高楊皆耳食之論也

雜詩三首

后皇有嘉樹受命生南國謬承雨露恩結根非一日如何游閒子攀條摘其實一摘已自傷况乃再三摘清霜凋綠葉榮枯良未測

泠泠山下泉汨汨谷中源中有雙鯉魚浮游戲波瀾江漢豈不深欲往道無緣風雲諒難遇栖栖守故淵但恐勾木枯終爲漁者憐感此令人悲置身良獨難

生平慕遊俠驅馬適東周周人重千金所遇非我儔撫劍登太山歷覽魯與鄒小儒事絃歌齷齪安足由北臨邯鄲道平原曠悠悠嘗聞虞卿賢斯人不可求悲哉窮途士緩急將焉投

擬古四首

閑夜會親友置酒臨高堂秦箏間趙舞吹笙復鼓簧清音隨飄風逸響繞修梁坐客咸同志寧復算羽觴人生忽如寄富貴安可常含情待所歡渺

渺天一方譬彼鵲鵲鳥揚聲待朝陽憂思鬱零雨白日何時光且當極歡
宴聊以慰中腸

薄遊上東門南望青山阿松柏鬱蒼蒼絕頂亦嵯峨中有避世者存身養
元和我欲求其人年歲空蹉跎驅車尋歸路延目望三河古來節俠士孤
墳蔽蓬科殺身不成仁倏如飛鳥過宛轉採芝曲令人生嘆嗟

出門行康衢所見但車馬登高望太行中原空曠野胡雁投南遷白日從
西下值此歲年晏無可爲歡者馳詠寄親友孤懷聊用寫布衣可終身爵
祿當自舍

處世如逆旅生年少至百朱顏易枯槁髮終變白一朝氣息盡奄然歸幽宅
衣裳弗復御車馬他人得豈無俎豆陳滿案不能食所以君子心鼓瑟以永日
佳賓時相過濁酒聊共適況此忘百憂陶然謝形役區區塵俗中鄙吝深可惜

雜言十一首

予屏處閑默久絕篇章維時新春偶感歲月慨然興言既復自課成袂輒
書以見襟抱隨事爲篇雜出無倫故云

青陽萌始節萬物咸光昭我亦動新懷晞沐起晨朝俯覽手中鏡仰看枝

上條枯卉有再榮華髮行已焦總角服遺訓老大望逾遙不傷華髮衰但
恐志業消學成在永久期之於後凋

右軍懷逸民向平悟易卦如何不決去皆云待婚嫁區區兒女情達士何
足掛我今履其境此語巨深訝嗟予喪鄉土舊業廢耕稼連蹇五九年玄
髮忽已化一女首甫笄兩男肩相亞依依向父情欸欸接言語素懷歸衡
廬顧此豈遑暇寒雞翼其雛鳴鳩均上下物性猶有然人情諒難舍何當
携幼稚盡室瞻遠駕

蜀嚴好沉冥日食止百錢卜筮人所輕久之操澗堅君子有所貴乃不在
當年百世有知音何必鍾期然子雲大區區譽之公卿間卑哉益州牧乃
欲吏高賢豈無王侯貴敢見不敢言斯道誠兩得永爲後世傳

此邦非吾土寄跡聊在茲旅食何所營亦復假耘耔玄冬苦霖潦良苗奄
離披至今賦澮間餘波渺相圍行恐春澤盛耕鑿失其時共虞斯人難豈
獨念吾私先師有遺言耕也有時饑且當竭所務天道非我知

昔予居南山樂有同心人形跡不覩乖棟宇復爲鄰有酒更相呼得粟還
我分時時採薪相携採荆薪兩賢不相猜所貴得其真一朝各異路隔

涉吳與閩拙宦失其宜薄責恒苦辛慈母抱沉憂興言涕盈巾昨者訪故
廬松竹稍或存依依親舊跡戚戚感良辰命駕欲相求風波限通津尙想
古人交俯仰愧此身

士有避世者高居浙江源王室方橫潰斯人獨孤鶩抱琴倚衡門清風拂
朱絃舉世莫能屈乃獨詣任延掃門愚爲辱尺牘情屢宣意義有相激權
位非所先周公下白屋斯禮自古然區區功曹檄何足致高賢

生平頗愛酒未嘗自斟酌一與佳賓遇陶然不復却雖得一醉歡傷生莫
能覺况復多謬忘空爲俗所薄靜言思利已一止良不惡東隣有父老顧
我忽大噉與子共秃翁忍棄手中爵酒爲榮衛積多憂正相博呼兒漉新
釀且復共酬酢醉罷各相恕誰誠責狂藥

青青女貞樹霜霰不改柯托根一失所懼此霖潦多高枝委爲薪落葉掩
庭阿弱柳對門植秀色一何佳物性固有常變幻其奈何

伯鸞春吳市伉儷乃相之布衣日操作椎結無容輝居貧敢忘敬舉案與
眉齊斯人亦何修感彼糟糠妻買臣躬負薪室家請長辭豈惟匹婦醜君
子諒有虧周道興閨房在席詎爲微所以卻缺轡重耳任不疑斯道久寂

冥摺撫爲此詩

余生憚遠涉旅寄百里餘自從去家來歲月忽已除歲晏人事迫卷秩還
故居楊鱸發東臯掛席指西隅且從家私務暫與友愛疎渺渺遵溪渚行
行人吾廬依依攜童弱藹藹會里閭啓扉玩東園綠葉榮菲蔬採之脩春
酒數酌忘饑飢但苦遭潦荒美秣無舊儲猶當望來稔尊中長不虛空名
百歲後此事非我須

抱拙衡門下久已忘鳴琴凝塵翳其徽絃絕調亦沈時還置我膝命酒聊
自斟高歌出金石拂拭趣已深酣來枕之臥冥此千古心吾亦忘吾形何
事待知音

春寒

齋居滯積晦餘寒襲春服谷風從東來微雨亂相續蘭心茁還卷蟄戶啓
仍伏樹冷寂鳴禽庭荒絕來躅此時重燃火傾觴泛新醪尋芳期自慰懷
人思方數淑景元易徂掩扉愁獨宿

三月三日期黃許二山人游覽不至因寄

睢靈無停機四序互相更唯有暮春節在肯重其名姬旦城洛邑多士方

來并羽觴隨流波逸語存遺聲秦王臨河曲高會列簪纓金人貢長劍夷
夏俱來盟偉哉伯王業小人非所營獨愛晉諸賢流風有餘清亭臯列茂
樹修竹蔭崢嶸幽蘭交綠坂清湍左右鳴濟濟少長集鮮鮮春服明中有
王與謝文華冠羣英沿坻玩流轉列坐無所爭觴來不復停篇翰隨意成
一醉達天和曠然遺死生俯仰宇宙間何物累其情我欲效斯人茲晨且
游行如何千金諾翻自意所輕歎逝懷方結望來念徒縈良遊誠難遇默
默掩柴荆

春日陪諸公往戴山眺集暮入北麓得石床巖洞諸勝

張宴凌崇巔返策憩澗陰南岑夙厭歷北麓今始臨危磴絕來術崩壑瞰
空潭幽竇抱虛白哀乳遶清音傍探闕窅窅側坐倚巖欹古苔紋已駁春
滿岸漸深幽禽語相續驚麋窟莫尋扳蘿冒修袂折蘭芳素衿奇蹤閱自
古勝賞發予心雖微舞雩詠敢諧溱洧吟山河永襟帶微生終陸沉愧乏
古人操將何視來今

初至西林喜遇徐幼文

與君三春別成此一會期清言美無度離緒俄相遺況復在丘園俱無冠

帶縻遶迤下澤遊皎潔艷陽時桃紅媚墟圃竿綠遍川坻覆觴申宿戀開
秩問新知澄懷悟淵冰脫迹仰冥飛幸同賞心遇白首永無違

春初遊戴山

雲羅橫四海田野無遺英尚賴二三子共怡山水情煦煦新陽動寥寥天
宇清昔人稱四美茲晨遂成并前登高丘阻遙睇澄湖明憑林招遠風松
檜自成聲俛仰天地間微軀良不輕安能自羈束坐使眾累縈處賤足爲
貴抱素詎非榮逍遙解神慮庶以適吾生

雨夜

寢閣去門遠春雨荒園夕誰謂在人境宛似空山客禽歸暗竹喧風斷疎
鐘寂戚戚寡歡悵良宵端可惜

山中送陳淮寅

春山有佳趣累日同遊寓我爲采薪畱君先拂衣去竹翠落閒階鶯聲出
高樹空館愁獨端依然携手處

春書

人間白日靜鳥鳴高枕餘薜蘿引修蔓綠覆茆簷虛砌筠初過雨窗風時

井書已無車馬跡適似田家廬於焉何足戀何自樂幽居

雨中試筆

門徑素來靜雨中人更稀
山禽時一轉田雉每雙飛
客散罷琴譙心閑清
道機南山有佳色相對共依依

酒醒聞雨

端居苦炎熱獨臥多早寤
微醉易成醒起聞山雨度
蕭蕭煩燠解寂寂涼
颼舉牀空簾更清漏永天難曙
豐霽落芳塘驚禽起山樹
此時一披襟將何慰幽素

晚涼放舟

徂暑驚節謝幽煩倦日永
翫舟乘夕涼沿渚入煙境
靄靄殘陽飛沉沉綠
陰靜蒼茫水客寂照見歸禽影
開襟招遠風延目認遐嶺
偶遊非素期炎氛聊暫屏
守拙寡世用尋幽得澄景
清賞猶未愜孤舟當重整

雨餘聞蟬

村園夏雨歇衆綠陰已成
高齋掩書寂新蟬今始鳴
嘈嘈斷更續嘒嘒遠
還經響悲逐涼吹射引雅
清曷耳念三集感物禁易
盈真恬方自化消

待秋林清

始聞早砧

寂寂秋景晏蕭蕭涼吹生閨人感寒至一軫遠人情嘹亮清砧動紆徐搗杵鳴微茫帶煙遠蕭疎出林輕此時離居客單眠夢亦驚披衣一憫悵斜月滿山城

詠秋荷

杪秋霜露重弱質感涼頻衰遲含夕氣牢落凌蕭晨
紅已散雨餘香尚近人翻思盛夏節玩舟涉廣津
摘花贈遊女採綠宴佳賓
秋風不少佇感此盡淪淪
人道每如此誰知衰盛因

秋陰遠望

重陰生夕霏陰靄紛如霧乍晴餘霞景已失前山處
氛氲迷去鳥杳眇沉疎樹望遠一淒然徘徊獨端路

初晴登望

茲晨氣候佳淫霖始云歇舉目眺西岑青翠連城闕
卉木藹陽和朝霞互興浹野杏花新試谷鶯聲乍發
岩壑晴色歛雲煙夕霏豁遇物感時芳馳

思生超忽心勝景無厭理存情自達延詠賦新篇聊當慰寂蔑

月夜舟行入金山 在吳中

夙志羨山水塵縈久未遑名峯久在望茲辰一來翔揚舲入南渚夕氣倏
蒼蒼紆直水無極沿洄路更長皓月懸高天廣川散飛霜夜寒人語清烟
屏繞洄塘歸樵逝谷響驚鳥動林光愛此塵境遠敢畏露霑裳

立秋日早汎舟入郭

連雲啓秋期金氣晨已兆溪雲合餘陰水霞相照耀登艫泛涼颿乘流駕
奔峭迴波蕩塵襟青山列遠眺蒲葢迷森沉菱荷爭官泥沙明衆女沆瀣
淨孤禽嘯端居積百憂暫出窺衆妙好爵豈不懷衛生乃其要寄謝滄海
人予亦堪同調

雨中偶成

空齋自瀟灑況復值秋初焚香對微雨如在古僧居庭寒夕鳥下烟澹暝
松疎知君寫詩處高情方似予

戴山石上聽松

滄耳俗諺久茲晨一清聽長松遡解颿哀壑互相應奔騰駭濤瀨竒眇韵

笙磬至音不假器始覺自然勝緣觸故成聲動極還歸靜此時憩石坐默
然待其定乃知棄瓢者未悟聞中性

曉起

竟夕人獨臥寢屏帳自開向無羈旅念秋思亦佳哉曙禽翻暗竹白露瀉
青苔從賦幽居意對景每難裁

秋郊行玩

新秋景物嘉樹綠畫亦凝微雨夜來歇朗然天宇清幽蛩條知候籬豈花
間鳴邊鴻水通信叢桂已含英恰因文墨暇一遶林間行幽棲寡塵慮散
步寫中情逍遙玩澄景焉知有世榮

寄中竺泐季潭

師從鍾山來遺我故人書一入白雲去相思秋雨餘徒慙塵土迹來擬竹
林居遙想中峯月清梵滿空虛

茗雪溪

巍巍天目峯高大歷南紀崩泉初濫觴奔放成茲水分流爲茗雪漚此古
城裏滔滔逝不停脉脉來難止極目更清寒漪漪澄遙渚朝來春雨漲涵

湧蛟龍喜舟橋紛來往萬斛等一葦翻翻輕鷗逝裊裊漁歌起我欲把釣竿來問玄真子

何楷讀書堂

整棹泛澄湖春物暢我懷前登何山嶺短策窮繁迴晉代有高人結屋臨澗隈至今讀書地石磴不生苔幽踪去已久遺構安在哉山僧依勝跡下結蓮花臺亂來各飄蕩龍象亦傾頽乃知興壞理道俗俱可哀清風動岩壑松聲四山來只疑斯人存遺韻尙徘徊我欲招其魂爽自但蒿萊臨觴聊一醉惆悵愧高才

碧瀾堂

藹藹層城陰瀾瀾溪流漫問誰所構堂軒窓傍高岸畚云唐刺史文采當時冠華筵勢獨高賓佐俱才彥吹簫橫落日畫鷁如雲散健兒簸旌旗水戰逞奇玩臨流賦新詩意氣共稱歎烽火幾荒殘城郭多遷換歌聲久矣滅郵亭鎖溪畔臺傾鳥雀下闌壞鳬鷺亂惟餘南山青依然眼中見

白蘋洲

層城鬱迢迢長溪貫雙流噴然闔闔中乃有白蘋洲茲晨策杖往秀色散

我憂宵眇蛟龍窟。澄明鷗鷺秋。開花照白日。接葉暗漁舟。涼風起其末。客衣薄颼颼。我欲携童稚。具此雙釣鉤。高歌綠水曲。散髮洲上頭。安能隨世人。負我平生遊。

下菰城

迢迢下菰城。乃在衡山址。卜築自何人。云是楚公子。連峯負崇墉。重闕抱溪水。得非蒸土成。詎乃久不圯。衢路化爲田。睥睨猶可指。牛羊恣來牧。狐兔穴不起。想當豪貴時。賓客盛莫比。高門遊俠窟。諸侯交贊禮。劍佩紛相摩。雜沓曳珠履。榮華不可常。零落今如此。豈徒雍門琴。獨下田文淚。

峴山

蒼山走南門。雉堞隱相並。明湖眇東涯。亂石背北向。勢如渴虹奔。飲首臨巨漲。孤亭壓其顛。窪石類盆盎。十手可對飲。斧鑿自天匠。平生愛山水。脫身事幽訪。落帆絕壁下。登探俯清曠。冥冥沙鳥逝。泛泛漁舟漾。崩崖露黃腸。云是古人葬。我聞襄陽山。茲名乃相況。羊公仁足懷。杜子功可尚。當時一躋攀。山勢益增壯。愧我非古人。登茲獨惆悵。且當隨鷗鷺。散髮凌浩蕩。長嘯天地間。身名兩俱忘。並音傍與忘皆去聲

陳武帝宅遺址

霸先亦人傑出自太丘陳洗馬初南遷卜宅茗溪津山川鍾奇秀末運生
異人出當梁祚衰殷憂致經綸拯溺濟橫流受禪主生民化家乃爲國霸
業誰與倫我來吊遺址四望靜無隣狐兔窟古瓦寒煙暮氛氲哀泉瀉幽
壑鬼火明荆榛感此興廢理乘時各有因憂來藉芳草嘆息淚盈巾

過雲巖在虎丘寺

逶迤度前峯到寺行屢歇齋庖竹外煙汲路松間雪觀水悟真源聞香解
禪悅欲共老僧言相對還無說

遷居懷沈都事

歲晏共依仁孤舟泊烟蘿以君吏隱地息我靜者躅家貧乞假多情狎兒
童熟畱滯連冬春繞庭芳草綠開樽對疎雨懸燈照深竹誰知今夜別獨
掩高樓宿

懷景佺師

旅宿厭煩喧愛此僧居靜蓮宇已摧頽茅齋自清迥山光林際來野色雨
中淨池水不生澗袈裟坐相映累日滯幽尋綠苔應滿徑

舟中

朝發戴山岑夕逗金溪瀆雲天方慘栗川途屢迴復飄駛岸疑轉棹奔山
似逐鷗鳥隨波泛霜漸孕蒼綠依依浣女影嫋嫋榜人曲采奇忘來久耽
勝成往速悅生良可懷狗名非所欲請試孺子歌去矣從我獨

送許尊師還大滌洞

青山九鎖處白髮一龕居清齋誦黃老不閱世間書餐霞食真氣對月禮
空虛暫來流水地應與孤雲疎遙知還山日仙壇春草餘

由竹溪至梅溪書贈莫雲樵

出門懷清曠人舟苦炎熾皇天從人欲飛雨颯然至風吹波上寒淒其感
秋氣暝投山僧眠復得清淨地舟人候明發徒侶不得遲汧流多枉渚篙
楫頗告瘁雖微三巴險事與五盤異聞昔天目頂靈物久潛閼一朝赴大
壑怒折崖谷碎回頭顧其兒首尾屢相值至今此溪水斗折七十二世遠
衆喧傳茫昧竟誰識但欣秋濤壯水物俱得志我何憚行役沿洄領佳致
鷗鳬泛澹濫蒲柳蔚蒼翠人煙亂餘集茅屋若碁置之子住河濬相望勞
夢寐每怨川無梁握手不可致憶昨訪我初茅齋夜深閉扣門滿衣雪僵

立不得跪移燈具難忝濁酒寒不醉同來鄭廣文清瘦凜欲睡絕勝王猷
蕙返棹何太易茲行冒暑雨古禮尙報施近將機輕撓待子思共濟散髮
乘長流垂竿釣清泚虛舟縱超越萬里誰能繫恐此未易期臨川一長喟

山中答武康徐高士寄書

久別得君書開緘散吾慮不寄山僧來何由知我處剪紙答君書還寄山
僧去爲問片雲間何時一相遇

舟中望佛燈院懷南澗

院在烏程六都施家橋東北久廢今爲歸

安前丘吳氏墳墓

蕩舟西陂上望山懷遠公遙知覆衲臥雪屋一燈紅事殊迹暫曠神交理
自通維當待歲杪期子白雲中

擬過園隱阻雨

在遠每傷離在近還成隔飛雨渺何窮佳期悵難得人寒市井空天晚江
潮白知君掩閣卧終朝遲來客

續懷友五首并序

子在吳城園中作懷友詩廿三首其後題識四人西嘉陵楊孟載介休王

止仲渤海高季迪郊徐幼文也時予與諸君及永嘉余唐卿者游皆落魄不任事故得流連詩酒間若不知有風塵之警者及兵後予移寓武林向所懷者往往不相見而五君者或謫或隱又各聯異嘆離合之靡常感游從之難得也故云

幽居古垣下共彼佳樹陰里隣豈無好念子是同心芳英帶露折清樽向月斟酌往尋遺躅荒園春草深

右余左司

藩翰屈長才蹉跎事文筆賓筵罷醇醲容臺淹下秩高門去復醉孤帆望中疾少別歲已華思君無終圖

右楊典簿

衡廬古巷中高駕日相顧芳草掩空扉知君斷幽步殘烟北寺鐘暮雨西閭樹携賞邈難期庶望遺緘素

右王逸人

予既遷山郡子亦返郊園兩地花俱發離愁春共繁已罷臨池賞仍睽傾座言從來作者意寂寞向誰論

右高徵君

常懷稚子悲復灑佳人泣草草從軍旅悠悠去鄉邑芳郊連騎行烟郭同舟入當時苟不樂追權何由及

右徐軍咨

送方員外力疾歸吳興

終年不出戶出戶卽相違疾病欣在告田園應暫歸天寒孤舟發歲莫行人稀棹師遵舊路田翁識故衣望間桑梓在入里人民非傷哉展丘墓遽爾辭荆扉居鄉如遇客回首情依依晴春入舊臘積雪含清輝佳期遲子還勿愛故山薇

送莫翥入郭知還溪居二首

舉世皆如醉何人獨愛才余雖識君者相對亦徒哉落日收書卷涼風送酒杯紛紛俗中悶空谷遲重來蟬鳴山郭晏一棹出烟扉涼風將皓月迢遞送君歸自識門前樹遙聞窓下機應歎緇塵滿臨流一澣衣

讀書圖

幽棲出塵表脩翠連松竹袖得碧苔篇閑來石上讀日暝欲忘還山空人轉獨

岳鄂王墓

中原千里志西湖四尺墳長城忍自壞神器憑誰分流血應爲碧渚背護成文覆巢無全卵讒鋒射元勳英魄孰相友濤江有伍君

楚江清遠圖爲沈倫畫并寓九曲山房作四首

烟扉亂晴旭遙見西林山憶歸東湖遠人家春樹間荆扉映水掩藤得隴
公還

潮落寒沙廣蒼然遠山暮何處吾師歸自識門前樹披圖憶所歷彷彿松
滋渡

狼啼楚山晚雲生冒洲渚返照入澄江風吹半峯雨中有遠行舟悠悠待
徒侶

寒煙引輕素斜日在高峯但聞猿鳥響更無塵土踪山僧願投寺迨邇來
清鐘

松下曉櫛

凌晨盥漱罷獨步南堦行悄然四隣寂暫此息營營散髮綠陰下一櫛晨
風清彈冠塵自散振衣香更輕松蘿空中墜荷氣靜時生悟脫遂真性俛
仰忘憂情

元日喜雪懷方員外以常

片片逐年來皎色映樓臺墜花驚爆竹落素濕香梅遶林春宴罷撲馬早
朝回應知洛中客高扉徒自開

槎史赴臺爲高季迪赴建而作

高臺闕江山梯航輳成闢佳麗煥夙昔而獨慘我顏遊者固云樂子去不復還平生五千卷寧救此日艱天網詎恢恢康莊徧榛菅所恃莫可滅才名穹壤間

題陳長司畫是其臨難時作

若人悟縣解委蛇順天刑慷慨赴東市一日爲千齡李公悲上蔡陸子喟華亭識機若不豫達生良可經朱絃亦易絕仄景不可停從容洒芳翰炳煥若丹青好藝永傳世精魄長歸冥披圖懷平素涕淚緣襟零

於書篋中得高吹臺所寄詩遺藁

拂塵啓弊篋忽攬故人詩撫迹疑若存驚逝杳難追憶昔吳苑遊文采衆所推名談析妙理華襟吐芳詞予時僑城北高齋臨清池焚蘭延佳月對酒彈清絲誰云茲夕歡乃爲千載期冥漠遊魂遠淒涼親翰遺墨塵尚流馥紙弊猶含滋玩此塗洒澤想君哦咏時華章未及報厚意良已虧收竟一長慟林風響餘悲想當寫寄日茲感君詎知

娟淨軒

綠竹有異質，夙著風人篇。猗猗瞻淇隈，籊籊懷衛泉。拾遺美形容，復有娟
淨言。微植被獎飾，麗句永流傳。若人同所尚，掇辭以名軒。攢玉轟森爽，編
翠鬱芊綿。鮮標貫寒日，密葉冒清漣。遙想佳雨餘，靜對罷鳴絃。濡翰傳霜
節，擗管題春妍。聊探詞詠妙，默寄圖繪宣。近將汎濤江，息駕依名園。攀枝
掃涼月，憩陰濯寒烟。雖微求羊高誦，附嵇阮賢緘。詩附所愛，纏繫日爲年。

倪雲林畫

南枝有高士，乃在延陵東。清時不肯仕，減跡雲林中。拂石坐蘿月，絃琴寫
松風。焚香誦黃庭，望雲送歸鴻。門車常自滿，尊酒無時空。乘興盡滄洲，古
人未爲工。干戈懷末路，白首隨飛蓬。名山乖始願，羈遊無所終。頓有車武
子，能哀阮籍窮。傾壺醉陶令，辟堂延蓋公。流俗輕高賢，貧賤困豪雄。孤鳳
混雞羣，野鶴摧樊籠。豈乏梁伯鸞，不聞臯伯通。吾將傳道逸，清芬千載同。

觀習禮神樂觀歸而有作

維皇禋明祀，卜郊時再陽。指期戒先事，習伏誦故章。竹宮儼清閼，羽佩溢
中堂。龜階羅舞鉞，著位表官行。升歌出睿藻，妙奏發清商。臚音肅遠響，華
鐘泛高張。虛囂待寶醲，薦璧頌承筐。想茲天步臨，穆若垂景光。駿奔貴有

恪報說永無疆豈同交門享惚恍事神方揆予承人乏具寮慙奉常茲
陪羣彥會此靈時旁執禮素寡術敕躬何敢忘愧無安世歌裴裏望齋房
紀行十首洪武七年甲寅臘月奉旨乘驛往鳳陽祭皇陵道
經目覽爰筆舟中用記其實

龍江灣

玄天無烈風江水日夜清馳波渺東注迴流抱神京至哉鍾水德乃以龍
爲名舟檣萬方合雄麗殊百城昔云天塹險今作衣帶縈山川跡不改人
理有代更下馬入官船茲焉始孤征祀事有常期中心念王程俯視萬仞
淵不啻溝澮平涉川古所戒事重軀命輕

觀音山

連山爭南馳劃斷滄江曲勢如萬馬奔鞭輻忽迴復石角不戴土蒼然四
無麓寸草不得榮唯含古苔綠浪波撞其根岩竇饗琴筑浮圖乃善幻凌
虛駕佛屋行人願利涉望拜各致祝人生貴無事安能慮存覆我欲升其
巔憑高快心目飛傳不可留一往如電速

竹篠潭

凍雨不成雪客行利新晴迴睇三山外殘陽霽餘明江神不揚波歸流澹
且平使者誠寡德國家育威靈笳鼓發中州擢歌悲且清醴酒凌長風篇
翰條已成常讀皇華章征夫任匪輕愧無咨詢効何以答聖情

金川門

兩山夾滄江拍浮若無根利石侔劒戟風濤相吐吞維天設巨險爲今國
東門試將一卒守堅若萬馬屯我來犯清曉天空霜露繁列宿森在列北
斗峭可援江光合海氣溟濛神攸存俯視不敢唾中有蛟龍蟠浮圖者誰
子高居凌風旛下見渡口人擾擾蜂蟻喧愧彼超世士去去將何言

邗溝

衰楊夾高防北風暮颺颺道逢長老問答言是邗溝相傳開鑿初民勞天
爲愁至今濁河底時見白鬪艘陸通梁宋郊水漕荆吳舟渠成萬世利慮
始難爲謀至今南北交此土爲名州飛閣跨通波張幄如雲浮憶昨少年
日寶馬珊瑚鉤經過劇辛輩結託金張儔醉月瓊花觀徵歌明月樓羅綺
朝還暮笙竽春復秋繁華逐逝水一往不可留向來歌舞地茫然孤兔丘
家老無兒孫杖策驅羊牛少小心尙爾不知今白頭欲從亂離說恐予增

離憂長揖分袂去零淚如絲流

高郵城

茫茫高郵城下有古戰場當時魚鹽子弄兵此跳踉燕師掃境出供餽走四方長圍匝百里旌甲耀八荒譬如高山頽一卵安足當驕將存姑息頓刃待若降兩機不容髮百萬莫與亢鹿走命在庖居然屬真王空餘菩薩臺落日風吹黃

清口

豁達兩河口前與黃河通高岸忽斗折清淮匯其中甘羅城在南韓信城在東一爲秦人英一爲漢家雄人生有不死所貴在立功方其未遇時鹿鹿何異同時命苟未會丈夫有固窮舍舟登高防歲暮百草空坡陀隴畝間一二老弱翁遺跡不可問但見荒榛叢行行重回首目斷雙飛鴻

龜山

輕舟俯淮流千里不見山披衣起清曉忽覩青孱顏始覺客愁散頓忘行路艱安得策飛筇一造幽人關翻思在山日午巖厭登攀物少乃足貴不在美惡間役夫告我言此下棲神姦噓氣成江河須臾駕岡巒僧伽大威

力困彼一掬怪石岩下無底繫以千連環至今風濤夕猶聞響珊珊茫茫淮泗流禹功不可刊傳奇乃由誰此語當重刪作詩寄崖石庶以開愚頑

歸過白馬湖

沿流信歸棹漸與青山遠遙見鴈鵠飛靡蕪春向淺空嗟心愛離莫緩愁腸轉不對芳樽酒紛思終難遣

三河口望京闕

周年赴陵邑穉景懷京闕引領鵷鵠觀言旋桃李月綠蕪滿芳甸青山麗佳節沙氣已含春柳意方辭雪征夫雖邇近同心仍阻絕逃空庶無遺賞勝聊自悅吾其和天倪將從莊生說

賈客樂

長年何曾在鄉國心性由來好爲客只將生事寄江湖利市何愁遠行役燒錢醺酒曉祈風逐侶悠悠西復東浮家泛宅無牽掛姓名不繫官籍中嵯峨大舶夾雙檣大婦能歌小婦舞旗亭美酒日日沽不識人間離別苦長江兩岸娼樓多千門萬戶恣經過人生何如賈客樂除却風波奈若何

長安道

長安城中多大道滿路香塵風不掃三條廣陌草斑斑十二通衢人浩浩
少年結客事遨遊繽紛冠蓋如雲浮朱衣公子金泥障白馬王孫錦帶鉤
五公七相稱豪貴貴里豪家誰得似走馬章臺柳似絲關雞下社人如市
涇川渭水轉依微五陵北去望逶迤還有閉門讀書者長年不出長蒿惹
不學城中遊俠兒百年身死何人知

行路難

君不見富家翁舊時貧賤不得志平生親戚皆相棄一朝金多賤還貴百
事勝人人莫比子孫成列客滿堂美人四座回鳴璫躍馬揚鞭游洛陽片
言出口生輝光由來本自一人事人心愛惡不相當季子西遊窮困婦妻
織自若嫂不炊行路難良可悲不貧賤那得知

守宮詞

鈿盒和丹食龍子胭脂夜凝神血紫老蟾玉杵寒丁東鸞尾輕輕飛碎紅
靈砂沁透白玉腕細看每將羅袖捲分明皓雪棲彤霞香痕笑比萼綠華
還籠半臂紫盤帶蝶粉蜂黃鎮長在天桃一點老青春門前魚目深如海

百索詞

越羅窄袖香如雪五色絲茸相關結看誰結得絲最長管取自身無口舌
大姑巧擘松紋細小姑雙盤作人字揎來只依金釧寬剩得畱將繫郎臂
繫郎臂結郎心一寸絲繩一寸金愛惜莫教容易斷直到明年與郎換

吳宮春詞擬王建

館娃宮中百花開西施曉上姑蘇臺霞裙翠袂當空舉身輕似展凌風羽
遙望三江水一杯兩點微茫洞庭樹轉面凝眸未肯回要見君王射麋處
城頭落日欲栖鴉下堦戲折棠梨花隔岸行人莫偷吟干將莫邪光粲粲
楚宮夏詞擬張籍

渚宮四面芙蓉開碧水晴搖冰井臺玉壺蔗漿光滿滿當畫君王頻賜來
雲綃半幅涼釵滑暖琴向風彈白雪冷玉屏開十指寒輸却鸞篋戲相奪
吳綾畫扇鎮長新肯信年年有炎熱不願生入蓬萊峯願妾世世居王宮
秦宮秋詞擬李賀

涼波翠濕南山影露滴金人光炯炯君王夜半捲衣回樓壁斜開蜀雲冷
西宮桂熟離離子海童不歸海塵起蟬蛄啼老不勝秋小玉採香惜香死
胭脂影破澄潭白菱角尖尖怎堪摘鮮紅皺綠來滿船樓前涼月光團團

漢宮冬詞擬溫庭筠

石鯨呿浪搖金池吹盡宮梅如雪枝
避風臺高風不到寶帳熟眠人未知
象爐紅熾後猊影氍毹軟翠鴛鴦並
李娘喚春春爲回笑却人間求火并
椒房小妓起常先玉瓶暖手濯溫泉
白頭臣朔寒無履待詔金門霜滿天

寄衣曲

家機織得流黃素首尾量來寬尺度
象床玉手熨帖平緩剪輕裁燭花莫
含情暗忖今瘦肥著處難知宜不宜
再拜征人寄將去邊城寒早莫教遲
啼掩雙扉空淚落舊繡遮身曉寒薄
良人早得封侯婦妾身何愁少衣着

長干行

長干人家向江住朱雀橋邊舊衢路
參差碧瓦颺青旗繫纜門前有楊樹
竹弓射鴨向汀洲家家無井飲江流
女兒數錢當酒肆商人買笑開娼樓
謝家子弟如蘭玉不見當時舊遊躅
夜深月滿大堤寒愁聽陳王後庭曲
送君策馬此中行秣陵遙接石頭城
愁來滿引金陵酒莫聽秋風淮水聲

吳宮白苧辭

織成白苧勝白絲恰稱吳娃冰雪肌
渚宮金剪製舞衣白雲一片筵前飛

舞衣當筵潔且輕。君王旧盼心已傾。徘徊玉階夜露零。桐花拂面微涼生。
銀燈結穗見疎櫺。墜簪遺珮滿中庭。此時不說紅錦綺。得以千秋薦恩喜。
璧月團圓墜江水。姑蘇臺上烏啼起。

溫泉宮行

并序

有客自秦地驪山來言溫泉宮已廢。唯泉尚未涸。上池使客所浴。下池行人所浴。感而賦此。

煌煌帝業三百年。驪山宮殿空雲煙。美人艷骨爲黃土。山前不改舊溫泉。
溫泉雖在君王去。芳草淒淒滿宮路。泉聲如泣日將暮。莫山雞亂鳴上林樹。
憶昔玉環賜浴時。紅樓綺閣香風吹。頭上寶釵涼欲墮。蓮步輕扶雙侍兒。
有客今年曾過此。宮壤牆傾山色死。虎旅知更不復聞。池上玉龍猶噴水。
當時此水在天上一沐恩。波滢莫比六宮粉黛不敢唾。今日行人闕來洗。

咸陽宮行

并序

客言咸陽宮亦廢。有民種瓜其上。感而遂賦。

百二山河象祖力。六雄仰關不敢敵。金人十二高崢嶸。天下甲兵從此息。
天子曉御咸陽宮。樓閣高低復道通。十石之鍾萬石簾。遙聞天樂在虛空。

宮車隱隱春雷起渭川曉漲胭脂水六宮粉黛漫如雲不救明年龍死
榮華奄忽何可論千門萬戶無復存遺墟久被民家占四壁空餘瓜蔓根
行人爲問瓜田老地上揮鋤休草草荆軻昔日猛如狼曾來此地見秦王
百夫之勇猶披靡汝今搪突何敢爾

驛船謠

驛船來鼓如雷前船去後船催前船後船何敢住鋪陳惡時逢彼怒盡屏
繡褥紅氍毹春夢暫醒過船去棹郎長跪勸使臣願官莫喜更莫嗔古來
天地如郵傳過盡匆匆無限人

聽蟬曲

黃鶯紫燕寂無喧新聲最好是聞蟬栖烟初噪如喧簫吸露才停似斷絃
乍向風前聞杳裊營營嘈嘈鳴不已斷續能牽客夢長淒涼解動羈愁早
一番蛻脫已身輕最是居高韻更清莫道轉丸穢壤底冠綬還比侍臣榮
長樂宮中百鳥靜十二簾開漏方永忽向林翻下苑多少蛾眉倚闌聽
隋堤千樹柳如煙無情偏向夕陽天切切自將亡國恨淒淒欲共路人言
蟬聲到處何曾別人心聽來有悲悅何如一枕北窓眠喧寂都忘聞見絕

古朴樹歌

山前古木不知年，婆娑黛色上參天。霜柯反足闢龍虎，偃蓋倒影鳴蜩蟬。
綠葉參差有生意，中間孔穴萃蟲蟻。上枝杳杳橫蒼雲，下根落落穿厚地。
樹傍古廟祀土神，人來酹酒澆樹根。但願神靈長血食，樹木與人終古存。
村中老人長孫子，自言此樹多年紀。憶作兒童上樹時，今見根柯已如此。
曾經喪亂見太平，幾遇斧斤還不死。山僧愛此來誅茅，盤鬱蒼翠富簷扃。
待余六月携床至，臥聽南風鳴海濤。

踏水車謠

田舍生涯在田裏，家家種苗始云已。俄驚五月雨沉淫，一夜前溪半篙水。
苗頭出水青幽幽，只恐飄零隨水流。不辭踏車朝復暮，但願皇天雨卽休。
前年秋夏重漂沒，禾黍紛紆滿阡陌。傾家負債償王租，卒歲無衣更無食。
共君努力莫下車，雨聲若止車聲息。君不見東家妻前年換米向湖西，至
今破屋風兼雨，夜夜孤兒床下啼。

戴山迎送神曲

山蒼蒼兮多木，橫絕四野兮下無麓。愀遠望兮登高，神不來兮勞予目煦。

煦兮雅雅靈修儼兮紛來御叶胡不來兮夷猶將誰須兮遠者芳莫芳兮
澗有萍潔莫潔兮叶之清雲爲蓋兮霓爲旌神之來兮山冥冥絳闕兮
朱堂冠余山兮神所宮神之愉兮既降叶翩龍駕兮雲中曼舞兮僊僊紛進
拜兮庭前靈夭姣兮好服神弗言兮意已傳牲不實兮酒不旨將淹神兮
神安止神弗止兮福遺我事決君兮長無已

余將軍篆書榻本歌

卽忠襄公闕也

余將軍守舒州舒州之城大如礪長江西來繞城流賊船如雲壓城破將
軍提劔城頭坐劔未動虜已奔鯨鯢蔽江江爲渾孤軍六年二百戰王師
不來城自存無兵猶足戰無食安可支豈無愛妾與愛馬殺之不解壯士
饑力盡矢竭將奚爲倉皇辭舌罵不已義士千人同日死祇今還有盡忠
池碧血清冷化爲水將軍持節東州時作此篆書形崛奇妙墨已隨神物
化好事當時臨得之雖非其真意獨在垂金屈玉蟠蛟螭我拜重是忠臣
跡秦相雖古其人非嗚呼將軍此書配者誰請君摩取浯溪石上中興碑

蔡軒歌

昔君種蔡吳門東南風五月花茸茸叶年走馬看花去叶社家有酒如花紅

今君種蔡荆山下五月開花還繞舍看花對酒豈無人祇憶故人無在者
種花人在未成翁何事看花人不問我亦當時看花者忽到花前如夢中
握君手爲君壽但願長看君花酌君酒

畫雲山歌

我昔曾遊廬岳頂欲上青天凌倒景山中白雲如白衣片片飛落春風影
雲晶晶兮花冥冥萬壑盡送洪濤聲恍然坐我滄海上金銀樓觀空中明
上清真人笑迎客夜然桂枝煑白石手持鳳管叫雲開虎咆龍吟山月白
明發邀我升東峯導以絳節雙青童天雞先鳴海出日赤氣照耀金芙蓉
屏風九疊花茸茸霧閣雲窓千萬重胡不置我紅壑中一朝垂翅投樊籠
空留萬片雲掛在清溪千丈之寒松愁來弄翰北窓裏貌得雲山偶相似
遂令殘夢逐秋風一夜孤飛渡江水夢亦不可到圖亦不可傳不如早賦
歸來篇仙之人兮待我還安能離離塵土間坐令白雲摧絕無所歸青山
笑我凋朱顏

醉樵歌

華蓋山高亘南

楚賸產奇材少榛莽山人嗜酒而業樵背負清樽手持斧

丁丁伐木雲之深東薪欲擗力不任且傾醺醺藉盤石痛飲莫知西日沉
白眼望天歌鼓腹櫛衣半染苔花綠頽然俯枕樹根眠鼻息如雷撼巖谷
起來却笑朱買臣底用金紫纏其身堪羨劉伶行倚鍾生死無累全天真
榎楠豫章等枯梗惟取醅醕真樂境泛觀世士多沉酣誤入牢籠猶未醒
松陰夢詞

陽坡碧草秋芊綿疎影漏水團綠煙龍枝無聲山日午仙骨蛻空神惘然
冰魂微回海山小冷泠鶴語青林表俯視黃塵蓋九州悠悠凡夢何時曉
寫生碧桃花歌

少年慣作看花客陌上桃花總相識春風似向此中偏一種花開百般色
只愛深紅更殘紅君家此本更不同枝上白雲吹不散階前明月照疑空
一從一衡根各別香上斜封愁欲折畫筵紅燭人半醉忽見此花驚是雪
武陵秦人那得知河陽滿縣徒爾爲當時東風千樹錦未比君家瑤樹枝
翠禽飛來嗟易見粉蝶棲時難可辨紅粧美女嬌如花着向花間應掩面
花今正開鶯亂啼酒醒拈筆爲君題羨君兄弟如虹霓豪飲不愁花下迷
玉壺清酒金偏提纂箏羌管齊走覓橋西舊酒伴莫待風雨花成泥

趙魏公竹枝歌

趙魏公宋王孫風流白晢更能文丹青自比董北苑書法兼工王右軍至
元詔書徵草澤召見廷中推第一三府趨朝賀得人萬乘臨軒賜顏色殿
前落筆侍臣驚難林象郡總知名夫人通籍宮中宴兒子承恩內裏行一
家三人書總好天子頻稱古來少疏廣歸來有賜金張芝閑處多章草全
盛須臾那可倫百年喬木易成塵淒涼故宅屬官府零落諸孫隨市人空
畱遺跡傳身後一紙千金爭買售屏風畫絕爲誰收團扇書工亦何有唐
生購得墨竹枝一尺中含千尺姿若非松雪齋前見應是溫波亭下披曲
池已平臺已壞露葉煙叢竟何在唯有雙溪水北流至今猶遶空牆外

畫山水行題趙侍制仲穆所畫江浦晴楓林滿酒二圖沈才幹
所藏也

古來名畫傳父子唐有二李蜀兩黃吳興公子冠當代誰也繼之早擅場
宋祖子孫畫龍種毛骨固是非尋常珊瑚寶玦久零落空有妙藝傳文章
至元天子親召見徒步便賜中書郎奏圖每得天顏喜盛以金匱白玉堂
遂令世人爭貴重門戶雖遲如堵牆雍初騰蹕晚一蹶五陵豪氣無時忘

吳姬越娥坐相擁始肯落筆揮縑緗五日十日一水石屏障彷彿生輝光
君家雙圖何所得私印乃出牟陵陽一圖汗漫秋水闊雁鴻排序投瀟湘
山僧悄尋孤寺遠客子喜甚高帆張一圖祥兒衆峯出疎林葉赤天雨霜
消搖巾舄者誰氏可是商顏之綺黃風塵洞洞二十載玉軸錦題多散亡
圖書祇應天上有人間那得千金藏從來好事遂成癖雲烟過眼如毫芒
君不見王家桓家勢盡時複牆走鯨不得將何如城南佳山水千巖萬壑
摩青蒼與君對此飲美酒雖無南宮北苑庸何傷

梁節婦

赤城曉擁青絲騎玉鏡愁鸞落紅淚冰魂偷逐水仙歸綺樓一夜靈犀碎
六曲闌空不礙春羅帶盤風輕颺塵池波不動夜光碧青天影落桃花雲
相思月照樓前水離離芳樹流紅子無情桃李亂中開不學芙蓉抱霜死

贈四明袁生廷玉

儒而善相

和氏善相玉楚人乃失之後王不深諒空沉沙與泥方歎善相馬秦穆猶
見疑向無孫陽識終與駑駘齊人生窮達在用舍呂公許負將何爲君不
見淮陰餓隸封侯面沛公不遇仍貧賤又不見新豐孤客人莫顧可憐未

入常何薦英雄不用則爲鼠燕領虎頭何足羨衰生炯炯雙瞳方走馬能
識人中王如何不帶食肉相一生奔走鬚眉蒼由來目睫不自見何必借
取青銅光生云富貴不足取我欲玩世聊徜徉昔年夏統在京洛不說姓
名惟賣藥眼中不見賈侍中小海歌闌風雨作生平乎如其人飄然東
歸東海濱倘過鑑湖逢賀監爲報山人行乞身

題赤城霞圖送友歸台

結髮好名山遨遊遍吳楚東遊不到天台路長憶與公賦中語赤城煥高
霞翻然空中舉靈溪碧草春淒淒瀑水和風響秋雨我欲振金策飄飄凌
九垓遊神不死庭迴光眺瓊臺手招丹丘人共臥石上苔紅顏去人不復
返老大求仙嗟已晚生今一去愁人心贈生赤城圖聽我赤城吟勞勞亭
下一杯酒離愁萬里生秋陰客車明日當早發雲颿孤飛度東越國清寺
前千尺松歲晚應歸望山雪道逢寒山子爲寄相思情未絕山人若欲知
我心五界峯頭看明月

望太湖

登高丘望遠澤蓬萊三山不可測何如具區億萬頃洞庭連娟向空碧東

風吹盡吳天雲玉盤雙螺翠堪摘我昔東遊鳳凰臺嵯峨巨鰐如山來白
波不動鏡光曉雲颿千幅爭先開中流縮首心茫然恍如乘雲行九天驚
濤忽逐迴風旋砰雷轉轂奔雪山龍伯鬼國見眼前失勢一落鯨蛟涎舟
師拍浪况浪婆我亦再拜不敢言平時之險且如此何況震蕩洪荒先帝
堯咨嗟逾九年黃能無勳幽羽淵有子大聖與天通一朝出我羣魚中試
觀此湖陰始知四載功長養草木華無心謝春風吳越之事良可鄙虎戰
龍爭方未已水犀百萬今安在惟見夫椒白雲裏鴟夷身退帶蛾眉不直
滄波一杯水我欲臨流叫神禹湘靈鼓瑟馮夷舞盡挽湖波釀作葡萄春
飲醉扁舟臥烟雨程孟陽曰澹名趙忽規模太白語不凡近

沈氏宜春堂屏徐給事賁所畫春雲疊嶂

休文堂前花滿枝風物四時春更宜前年三月宴客時坐上才傑皆能詩
衆中獨許姑蘇客千里江山貯胃臆醉來意氣爲傾倒寫出層層好山色
素屏十尺粉堊鮮千巖萬嶂含春烟客子疑行灞橋路人家似住武陵源
山僧投寺亂松裏山下鳥啼人未起柴扉日出扁蓀蘿漁網波生撒江水
楚水湘雲互蔽虧渚宮隔岸遙霏微東崦晴嵐西崦雨何處長歌樵子歸

亭下流泉春浩浩上有居人往來道相過總是看山來衣冠雖別情皆好
主人愛翫不下堂清晨掃地坐焚香晴看似見孤雲起莫對疑聞細草芳
夫君平生於我厚記君新吟常在口長干一去無尺書謾對此圖嗟妙手
一從作吏此事廢從前畫癖今除否遙知紫陌紅塵下每爲雲山一回首
人生適意在杯酒萬事浮雲亦何有君乎何日歸去來畫裏青山待君久

倪元鎮畫竹沈御史所藏

雲林之子有仙骨平生好潔如好色紛紛濁士等蟲沙嗚呼瓚也何由得
憶昔常登清閭堂鵲尾爐爇龍涎香紹京妙墨僧繇畫示我不啻千明璫
人間萬事如飛電洗玉池空人不見季子城東土一杯何人爲著黔婁傳
繡衣使者騎青驄曾聽竹枝湘水東歸來見此若夢寐巴陵洞庭生眼中
江湖豪翰今零落君得此圖良勿薄愧我題詩憶故人黃鶴何年下廖廓

王元章墨梅

王郎志奇貌亦奇與世落落莫施一朝騎牛入都市關吏不識誰何之
歸來老作命稽客干戈欲起西南陲青袍白馬風塵裏越州城邊戰不已
雄襟自許魯仲連一箭無成身已死世上空餘寫墨花只將名姓花光比

於乎人生有才不盡用古來埋沒皆如此

錢舜舉溪岸圖

憶昔至元全盛日天子詔下徵遺逸吳興八俊皆奇才秀郎王孫稱第一
一朝玉馬去朝周諸子聲名總輝赫豈知錢郎節獨苦老作畫師頭雪白
江南沒骨傳者稀錢也得法誇精奇晴窗點染弄顏色得錢沽酒不復疑
今人祇知重花鳥豈識此圖奪天巧玄雲抱石雷雨垂蒼山夾水龍蛇遶
岸側溪迴共杳冥蒲稗深沉映魚鳥漁舟乍隨遠煙散客子競渡澄江曉
自云布置師北苑只恐庸工未深了卷餘更有魏公題字擬鍾王差未老
鄭侯得之恐神授使我一見喜絕倒雙溪流水清何極城外南山空黛色
文章翰墨何代無二子儔能躡其迹爲君題詩三歎息於乎古人難再得
吳興當元初時有八俊之號以子昂爲稱首而舜舉與焉至元間子昂被
薦入朝諸公皆相附取官達獨舜舉齟齬不合流連詩畫以終其身故二
公之詩各言已志而子昂微有風意覽者當自得之也

胡廷暉畫

畫師我識吳興胡身長八尺蒼髯鬚目光至老炯不枯藻繪萬象窮錙銖

大兒十歲能操觚小兒五歲能含朱得錢但供酒家需時復縱博爲歡娛
魏公家藏摘瓜圖妙筆奚翅千明珠胡一見之神頓蘇以指畫肚潛臨摹
落筆便與前人俱祝融撐空閣道孤朝雲暮雨相縈紆中天碧瓦仙人廬
下有桃源風景殊雞犬似是先秦餘潯陽野客山澤臞自從喪亂遭窮途
幸逢治世容微軀堯舜亦有巢由徒已辦小艇長鬚奴便欲往從漁父漁
江湖此境何地無趙文敏公家藏小李將軍摘瓜圖歷代寶之常倩延暉
全補聊私記其筆意端寫一幅質公公大驚賞亂真由此名實俱進故詩
及之

送沈孝廉讀書天屏山

秋空雨洗千芙蓉霜樹遶谷攢青紅嗟我欲游不可得子往畢業絃山中
念子出身自純綺秀如青松茁蒿蓬十年奔走鍛毛翮黃金散盡家已空
懷中一經不敢棄舍此將恐爲昏聩束書上堂告父母雲深獨往無僕僮
林僧谷叟頗驚客簾茶瓠飯意甚忠身閒晝靜百事絕經史左右相研攻
逕須跨海踏鯨背且莫負肩箋魚蟲車良路端期不止跬步自可升華嵩
學成靜候時自至譬彼力穡遭年豐朝廷懸爵待奇雋掇取五鼎榮三公

古來孝弟神所相未必使子羸其躬蹇予少學壯愈情聰明日損鬢已翁
世間有書未盡讀安得返老還爲童跛鼈卬由追驟耳贈子以策情何窮
倘有新知遠相教爲我緘寄東飛鴻

贈義興宣瘍醫

長橋下壓蛟龍宮岸上人家如鏡中道人賣藥臨溪水醫得青蛇是龍子
報恩不受千金珠龍伯親傳海藏書門前扶杖人如市妙術何愁三折臂
燕支山前白草秋冷入金瘡淚欲流安得金丹從爾乞提携玉龍還向敵
雙節堂奉化李公復祖母沈年二十生子七月而寡子既長沈爲

要兄女爲婦生二子亦寡長公達次卽復今皆已老故扁其堂

云

鳳嘴鸞膠難續絃雙龍鏡破難再圓阿婆二十已守節新婦哭夫方少年
大兒嬌啼母心苦小兒十月安知父破窓風雨來早秋夜續燈前共相語
山頭松栢摧爲薪山前翁仲亦成塵紅顏憔悴垂白髮生死不慙泉下人
莘叔耕畫梅雪軒叔時名野世居湖之蓮花庄

好畫誰如莘東強墮馬折肱猶未忘何年爲此寒林趣精絕未數左手王

屋裏何人坐吹笛似是南昌郡中客曲終朔雪忽飛來開門滿樹梅花白

送金秀才歸侍

風吹歷陽樹石城悲早秋高堂入遠夢拂袖登吳舟金陵官酒如乳香酌
君送君朱雀坊前日同來二三伴此時望君俱斷腸科名古來人共羨富
貴不如歸故鄉年年隨計多辛苦十上風塵竟何補秋卷留將篋內歸彩
衣重看堦前舞當時縣令親勸行今日還家父老迎門外清溪仍可釣山
下古田躬自耕子身長健親長在黃金如山不可買君不見長安城中罷
官客欲作布衣那可得

徐黃門盡

黃門給事三十餘面如紅玉少有鬚風骨豈是山澤癯問着只愛山中居
前年版下鶴頭書微起直上青雲衢文華堂高凌紫虛出入侍從陪金輿
排方小帶紅羅襦精神宛如馮子都朝下手拈八尺笏左旋右轉風生軀
有時自擎雙雕弧命中疊發誰爭呼歸來賓客滿直廬京城酒貴不住酤
爛醉坐叱蒼頭奴執燭寫此雲山圖方今臺閣多文儒似君才藝衆中無
又宜侍中武金吾不負堂堂美丈夫山中故人交不疎十年貧賤長相俱

升沉忽如鳥與魚麋鹿敢逐夔龍趨見君此畫恒嗟吁關西行李今何如
祝君名成歸五湖來尋高陽舊酒徒何辭解衣貰百壺與君痛醉黃公壚

韓介玉畫爲童中州掌教題

介玉乃張仲舉門人

我識河東老詞客鶴骨伶俜長八尺白頭徒步拾公卿人生變化誰能測
將軍跋扈天爲傾公持寸管力與爭當時直氣動朝野至今文采傳諸生
諸生白面今已老三載儒冠空潦倒罷歸百事無所爲萬壑千巖恣揮掃
丹立玄圃落眼前澗水松風鳴浩浩由來絕藝出天機肉眼紛紛爭醜好
吳興博士今鄭虔故山未歸雪滿顙今年召對席屢前蒙恩親賜水衡錢
歸來見盡心茫然拄杖欲問金華船金華之洞小有天下與五岳相鈞連
初平鍊丹去成仙弟兄聯袂風翩翩洞前白石如羊眠我欲訪之何由緣
安得與子相周旋饑餐紫霞拾瑤草石上一笑三千年

陳仲美夏木圖

董元夏木不復見俗本紛紛何足觀陳郎筆力能扛鼎寫此千童生晝寒
陰森似有神靈會偃蹇直作蛟螭蟠天雞曉鳴清籟發木客夜度雲旂翻
林下交人行杖藜石根葉落失舊蹊孤童襖被向誰宿山風蕭蕭日薄西

商巖紫芝自可食武陵桃花原易迷人間瀕洞不可處莫畏虎嘯并猿啼

姚運使溪山仙館圖

去年冬姚君繼華過于蕺山舍飲顧德堂爲

仲倫寫此圖今年春君遂以文學被徵陞任河間郡符運使矣

喜而賦之癸丑秋八月望識

去年君爲郡文學獨抱遺經惜命薄出門無馬坐無羈拜迎官長常作惡
今年君爲轉運使殊恩親出官家賜月給太倉三十斛況復官閒少公事
人生貴賤反覆間世上悠悠那解此憶昨訪我常嚴冬寫此溪山三數重
驛驢一去了無影空有遺跡泥沙中聞道河間故城裏開門遙見滹沱水
何時爲畫古邯鄲珍重函封寄千里

青弁雲林圖

前代何人畫山水長安關全營丘李華原特起范中立三子相望古莫比
亦有北苑與河陽後來作者誰能當米家小虎出逸品力挽元氣喘蒼茫
房山尚書初事米晚自名家稱絕美藝高一代誰韻頑只數吳興趙公子
當時弭節匡廬峯曾寫太平興國之神宮五峯却立疑爭雄臺殿突兀紛
青紅中有雲氣隨游龍我對此圖臥三日遂令奇氣生心胸亂來學士遭

海濱文藝草草誰能工筆精墨妙心更苦那得再有前賢風於平
蕩江海闊使我執筆將安從

丘大卿天柱峯圖

昔聞安期生飄飄入秦京上書三月初報罷拂袖去作蓬萊行却笑叔孫
通俯仰咸陽城長生亦何補身後畱空名何似長安少年客天柱峯頭煮
白石朝辭猿鶴下雲中暮逐夔龍侍君側繡衣乘驄馬蹀躞臺城下愛道
心不忘歸來坐清夜太平天子親齋祭新擢祠官捧圭幣紫壇醺火曉如
星獨着衮衣朝上帝翻思舊隱地石室生青苔來時壁上蒼龍劍七星剝
落空塵埃丹砂不復化蘿衣誰更裁人生窮達會有命何須千歲如嬰孩
草衣木食苦復苦王喬偃佺安在哉寄語空山舊泉石不須爲我生悲哀
功名倘遂乞身願萬里青天騎鶴來

再題廷暉山水

近代丹青誰第一精絕獨數吳興胡魏公家傳摘瓜圖將軍妙筆絕代
年深粉墨紛模糊公命胡也全其汚鷗波亭前山濤湖賓客不來人跡疎
以手畫肚私傳摹歸來三日神始甦下筆直與前人俱今人不見古人畫

古畫自與今人殊嗚呼眼前不復見此物吾與購之千明珠

山泉隱居圖入直回爲雲間朱卿題

日長侍立南薰殿聖主從容正開卷內臣如鵠擁圖書詔許近前曾一見
玉躔金題照眼新三王二李迹未陳妙筆森芒洞冥漠乃知今人非古人
歸來三歎北窓下開屏見此新圖畫流淙百折掛石梁古木寒松勢相亞
木末何人一草廬山泉之人昔所居鴻臚寺裏晚朝下對此高堂心鬱紆
華亭柳湖眼中見武陵桃源路豈殊老夫曾往康王谷五老香爐眠飛
亂來井臼今可存因爾高歌望黃鵠

列朝詩集

甲集第八卷